


柳田文庫
文庫11
D 289
17



文庫11
D289
17

元書卷九十

邵陽曾廉譔

循吏列傳第六十五

昔太史公傳循吏曰奉職循理可以爲治何必威嚴哉而其所敘次者孫叔敖子產公儀休石奢李離五人而已皆周列國諸侯相及理官也其傳酷吏言法令者治之具而非制治清濁之原也故厚貶秦而張漢以爲網漏於吞舟之魚而吏治蒸蒸黎民艾安其致美漢治如此則其詳漢代守令宜矣而柳宗元論封建則言公天下之端自秦始又言漢置太守有罪得出有功得賞非如王侯之必大逆不道始勒兵而夷之也是言後世守令實瘡於古之諸侯國也余嘗低昂二者之間以爲封建之不可行於三代之後殆事之必然無待計者何則地大則多橫決漢七國是也地小則列

元書

卷九十 循吏傳

空名於天下而不足示磐石之固新莽之亂諸王奉上璽紱惟恐稍後是也故賈誼欲眾建諸侯而少其力此足以銷一時之暴而非所以治天下之長策也且夫古之諸侯之地大不過一郡及二三郡而止也故侯猶守也相猶丞倅也丞倅佐郡而行其令亦郡守之美也太史公以爲漢無其人乎吳公文翁當時所贊歎也且班固何以稱焉蓋皋陶謨嘗言之矣知人安民惟帝其難之夫以帝之天縱文武而猶曰難斯可知知人安民之大而非可虛言以求治理亦明矣惟唐虞之世君臣明良水火土穀教刑工虞禮樂挈之於朝廷而委諸侯之治亂於四岳綱舉故目張領方故衣正此封建之所以咸亨也三代以來無殊此旨而化始乎畿甸教徹乎山海何其治也洎夫周轍既東其始猶知衣之安吉必有所受也繼而曲沃爲侯而葛繻之射烈矣然後乃爭奪相仍遂爲戰國

漸爲混一之勢而入於秦矣遂使人類淪於戎狄民生燼於水火豈不哀哉此封建之已事可觀者也故夫郡縣之天下亦非能易唐虞三代之治以爲治也亦在知人安民而已矣設使駕馭不得其宜治理不得其才元首叢脞斯股肱惰大臣不法斯小臣不廉則其欺民之深害民之鉅又何以殊於封建哉此又郡縣得失之林也豈時世之良限古之時皆奉職循理自漢以下遂無足稱道哉元興諸行臺省府州縣官皆以世襲若古封建之遺其時嚴實張榮劉敏塔本布魯海牙陳祐張耕劉肅皆著績蜚聲王義趙天錫杜豐田雄位雖居次亦有父母之譽然自李璿反叛人懷惴懼至元以後遂罷世官而以國人監視知印號曰達魯花赤漢人南人皆名列其下寢至南人例不得長臺省蓋國人包周身之防而失之於偏弊而饗典赤贍思丁賈居貞千奴合剌合孫王都中韓

元書 卷九十一 二
鋪干文傳何嘗不口碑在道至若覃澄張立道烏古孫澤劉好古
劉德溫臧夢解之流皆文質彬彬卓然良牧矣是則元家兼封建
郡縣而兩有之而治績俱可紀也夫治天下而無法莫如元之初
葉而東平以治最名天下儷體者亦熒熒焉惟其人足託也然而
難乎其繼之也故李璿之禍本無關乎安危之數而國之罷世官
亦古之制也世祖敦尚吏道雖以阿合馬桑哥之專橫無忌而不
能奪良有司之氣則亦惟志在安民而人之不易知未足以損其
知人之大也太史公殆以爲漢法寬而吏酷歟然不事威嚴謂懲
秦失則可矣非治法之平也皇甫規嘗言力求猛敵未若清平勤
明孫吳未若奉法故苟能澄清吏治匪但人民樂業亦折箠使四
夷有餘矣余錄元世循吏自塔本以下二十有餘人蓋班固之所
推挹進而合之司馬氏要之以皋陶謨之言若夫嚴實張榮之屬

已別有傳不復具焉

塔本畏吾兒哈密力人也以其好揚人善稱之曰揚公父宋五設
託陀託陀者其國王賜號華言國老也塔本初從太祖征戰朔漠
屢阨艱危復從圍燕下遼西諸城軍士有妄殺人者塔本戒之曰
民國之本也殺人得地何益於國且殺無罪以堅敵心非上意也
太祖聞而善之賜金虎符俾鎮撫白霄諸郡號行省都元帥得承
制除吏專決死囚久之徙治興平興平兵火傷殘民慘無生意塔
本召問父老爲除所苦薄賦斂役有時民大悅乃相與告教無違
約束歸者四集塔本始至戶止七百不一二年乃至萬戶出已馬
以寬驛人貸廉吏銀其子錢弗能償者焚其券農不克耕與之牛
比歲告稔民用以饒太宗二年詔益中山平定平原隸行省六年
李仙作亂塔本止誅首惡宥其誅誤太宗崩後二年卒遺命葬以

紙衣瓦棺贈推誠定遠佐運功臣太師開府儀同三司上柱國營國公諡忠武子阿里乞失鐵木兒嗣職一遵先政興學養士輕刑薄徭雖同僚不敢私役一民從伐高麗有功卒贈宣忠輔義功臣榮祿大夫平章政事柱國營國公諡武襄子阿台當襲父職適罷行省爲平灤總管府阿台遂爲平灤路達魯花赤始至蠲民鹽酒課八之一細民不征置甲乙籍籍民丁力民甚便之僚屬始至阿台必餽鹽米羊畜食器曰非有他也欲其不剝民耳姻族窮者月有常給民有喪不能葬者與之棺槨布帛資糧灤爲孤竹故國乃請於朝諡伯夷曰清惠叔齊曰仁惠立廟祀之以勵風俗至元二十四年乃顏反阿台獻馬五百匹佐軍世祖得乃顏銀寶卽以賜之明年入朝卒贈宣力功臣資德大夫右丞上護軍永平郡公諡忠亮子迭里威失成宗時入宿衛累遷樞密院判官延祐中授翰

林侍讀學士出爲河閒路總管河閒當水路要衝四方供億皆取給焉迭里威失立法調遣民便之復建言增置便習弓馬尉一人益邏兵之數於是盜賊屏息陵州羣凶爲官民害悉收繫死獄中後終遼陽參知政事子鎖咬兒哈的迷失自有傳

段直字正卿澤州晉城人也金旣南遷河北河東山東盜賊充斥直聚其族黨結壘自保國兵略地晉城直以其眾來歸太師木華黎承制署潞州元帥府右監軍其後分土世守命直佩金符爲澤州長官澤民多出避兵直命籍其田廬於親鄰之戶俟業主至析而歸之逃民間之多來還素無產者則出粟振之爲他郡所俘掠者出財購之以兵死而暴露者收瘞之未幾澤爲樂土遂修學宮割田千畝置書萬卷迎李俊民爲師不五六年士以通經被選者百二十人在官二十年朝廷特命提舉本州學校未拜卒子紹隆

知臺州

覃澄字彥清德興懷來人也父資榮金末爲交城令國兵下河朔以縣來附未幾賜金虎符行元帥府事從攻汴有功移病以弟資用代資用卒澄襲其職澄幼穎敏好讀書又習國語令交城時年十九豪民有持吏短長爲姦者察得其主名皆嚴治之太宗季年籍民戶有司多以浮客占籍及征賦逃竄殆盡官爲稱貸積息數倍民無以償澄入覲因中書耶律楚材面陳其害太宗惻然爲免其逋其私負者年雖多息取倍而止亡民來歸者復三年詔下公私便之憲宗二年復大籍其民澄盡削交城之不上著者賦以時集逾二歲世祖還自大理澄進見留藩府凡遣使必以澄偕而以其弟山阜代爲令世祖既卽位制書褒美擢懷孟路總管歲旱令民鑿唐溫渠引沁水以溉田教之種植地無遺利民用不饑至元

二年遷河南路總管兼府尹徙平灤數歲召爲司農少卿復出爲京兆總管遷陝西四川道提刑按察使建言不孝有三無後爲大宜令民年四十無子聽取妾爲宗祀計朝廷從之遂著爲令嚴忠範兵敗被逮以澄代之至則葬暴骨修焚室振饑貧集逋亡民心稍安會西南夷羅羅斯內附帝以撫新國宜得文武才遂以澄爲副都元帥同知宣慰司事夷人悅之以疾卒官澄無所附麗游顯宣撫大名嘗爲諸路總管求虎符澄至中書辭曰皇上不識澄耶乃爲顯所舉中書特爲去之其介如此子克修歷湖北河南漢中按察使

劉肅字才卿威州涪水人也金興定二年成進士嘗爲尙書令史時內藏被盜有十一人誣服肅爲詣省辯冤出之調新蔡令先是縣賦民以牛多寡爲差民匿不耕肅至命樹蓄繇者不加賦民遂

殷富瀕淮民有竄入宋境籍爲民而優其糧聞有歸者頗艱衣食輒出怨言曰不如渡淮告者以謀叛論肅曰淮一水耳果欲叛不難往也口雖言而心無實準律當杖八十奏可擢戶部主事金亡依東平嚴實辟行尙書省左司員外郎又改行軍萬戶府經歷東平歲賦絲銀復輸絲十萬兩色絹萬匹民不能堪肅贊實奏罷之世祖在潛邸邢州爲其食邑選良吏得張耕及肅以耕爲安撫使肅爲商榷使邢乃大治後復遷安撫使中統二年與布魯海牙同擢眞定宣撫使論定鈔法事已具布魯海牙傳明年授左三部尙書兼商議中書省事逾年致仕給半俸又逾年卒年七十六肅性舒緩而有執守善於易著述在藝文志後累贈推忠贊治功臣榮祿大夫上柱國大司徒邢國公諡曰文獻張耕字耘夫治邢最有聲世祖嘗與劉秉忠論一時牧守秉忠曰若邢之張耕懷之覃澄

何憂不治哉明孝太子擇龍興路守長亦曰安得治民如邢州張耕者乎耕以中統二年請老其子鵬翼代爲邢州安撫使以史軼其事故不別爲傳肅子憲官禮部侍郎愨大名路總管孫賡有文名始官國史院編修累擢監察御史六遷爲侍御史拜翰林學士承旨兼國子祭酒又入集賢爲大學士尋復任承旨泰定元年集議上尊號賡獨言其不可事遂已致和元年卒年八十一

奧屯希愷女眞人也其先世仕金爲淄州刺史父保和與伯父世英當國兵下山東時同詣軍門降俱授以萬戶世英遷德興府尹卒保和爲德興府元帥錫虎符尋領眞定保定順德諸路事凡闕田二十餘萬畝改眞定路勸農使致仕卒希愷襲勸農使皇太后錫之錦服曰無墮爾世業郡縣有水旱必力請蠲租調民賴之南征時置軍儲倉於汴衛歲輸河北諸路粟以實之分冬月三限失

終限者死吏徵斂舞法民甚苦之希愷知其弊蠲煩苛而民不擾尋兼知冀州希愷至爲約束健訟之俗爲變蒙古兵軍取民田牧久不歸希愷悉奪歸之軍無怨言至元二年遷順天治中改順德復遷知河中府秩滿當調時阿合馬當國官皆有賂希愷不往見之降知景州數月卒

姜彧字文卿萊州萊陽人也父椿避亂依濟南張榮因家焉彧穎悟好學榮辟爲椽歷知事郎中參議官中統二年彧與榮孫宏入朝因言李璫反已露宜先發制之未報明年璫果反襲據濟南彧棄家從榮招集散亡迎諸王哈必赤兵及城且破彧言於王早諭諸將分守城門無令縱兵爲暴從之民以獲全彧以功授大都督府參議改知濱州時行營軍士多占民田爲牧地縱牛馬壞民禾稼桑棗彧言於中書遣官分畫疆界捕其強猾者寘之法乃課民

種桑歲餘新桑遍野人名爲太守桑及遷東平府判官民遮道請留馬爲之不行至元五年拜治書侍御史累拜西臺御史中丞復除燕南河北道提刑按察使三十年年七十六卒時有通州張礎可用亦以賢吏名礎祖伯達知通州父範爲眞定勸農官礎早事世祖於潛藩及卽位使權中書左右司事數轉知威州投下官暗赤之奴引鳴鏑射婦人而匿暗赤家礎捕出其奴論如法後按察浙西廣西等道其宣慰使掠民爲奴及奪民財礎皆劾罷之累遷國子祭酒出爲安豐總管卒官諡曰文敏

許楫字公度太原忻州人也幼從元好問學年十五中詞賦選河東宣撫司舉楫賢良方正孝廉至京師王文統以爲中書省掾辭以不任簿書改知印丞相安童左丞許衡深器重之一日從省臣立殿下世祖見其美髯魁岸問曰汝秀才耶楫頓首曰臣學秀才

耳未敢自謂秀才也帝善其對授中書架閣庫管句兼承發司事未幾立大司農司以楫爲勸農副使時商挺爲安西王相遇於塗楫因言京兆之西荒野數千頃宋金皆嘗置屯如募民屯田耕種得穀可給王府之需挺以其言入奏從之三年屯成果獲其利命佩金符爲陝西勸農使世祖旣平宋廉希憲行省荆南楫爲左右司員外郎宋故老輿金帛求見楫曰汝等已爲大元民矣今置吏以字汝也金帛何爲明年擢湖南按察副使武岡富民有歐死出征軍人者陰以財誘其佃戶款服楫審得其情罪坐主者人服其明徙按察江西時招討郭昂討叛賊董旗兵士俘掠甚眾楫究得良民六百口遣還鄉里授徽州總管桑哥立尙書省會計天下錢糧參知政事忻都戶部尙書王巨濟倚勢刻剝遣吏徵徽州民鈔多輸二千錠巨濟怒其少欲更益千錠楫曰公欲百姓死耶生耶

如欲其死雖萬錠可徵也巨濟雖暴亦爲壽威州賴以免徙東平總管謝事二年年七十一卒其時有豐人謝仲溫君玉父睦歡太祖時力戰有功仕至太原路金銀鐵冶達魯花赤仲溫早備世祖潛邸宿衛大軍圍鄂仲溫教軍士曾魚充食世祖喜之元統時擢平陽太原宣撫使遷順德總管時方用兵江淮有寡婦鬻子以償運直仲溫出俸金贖還之數歲遷湖南宣慰使又改淮東歲旱仲溫導白水塘溉民田公私賴焉致仕還年八十一卒

耶律伯堅字壽之桓州人也性豪俠喜與名士游用薦入官爲工部主事改清苑縣尹初安肅州苦徐水爲害訴於大司農大司農欲奪水故道導水使東東則清苑境也地勢不利伯堅陳其形勢圖其利害要大司農司官及郡守行視可否事遂得已縣西有塘水溉民田甚廣勢家據以爲礎民訴失利伯堅命決水注田許以

元書 卷九十一
溉田餘月置礎竝以其事列於省部著爲令縣居南北衝歲爲親王大官治供帳易歲復徹而新之費不貲伯堅築館代帳其弊遂絕凡賦役有重於他縣者輒詣府力爭之在清苑四年擢同知恩州去民立石頌之

田滋字榮甫汴梁開封人也累官監察御史宋平建言江南新附民情未安加以官吏侵漁宜立御史臺以鎮之詔從其言遂拜南臺侍御史歷兩淮運鹽使河南路總管大德二年遷浙西肅政廉訪使有縣尹張或者被誣以賊獄成滋審之但俛首泣而不語滋以爲疑明日齋沐詣城隍祠禱焉廟令進曰曩有王成五人持誓狀焚於此火未滅而去今其遺草在壁間豈其是耶視之果然卽至憲司詰成等不服因出誓狀示之皆驚愕伏辜或遂得釋久之改濟南路總管尋參知陝西政事時陝西不雨三年滋道西嶽禱

於神到官而大雨因開倉以麥五千石給小民之無種者俾成熟以償官民大悅以疾卒官贈通奉大夫河南參知政事開封郡公諡曰莊肅

臧夢解慶元人也宋末成進士未官而國亡至元十三年內附授婺州路工匠提舉以薦改知海甯州淮東按察副使王慶之按部至其州見夢解爲人剛直自任職以來門無私謁官署肅然凡有差役皆當其貧富而吏無所預於是民增戶六十四田增頃四百四十三桑柘榆柳交蔭境內而政平訟簡爲諸州縣最乃舉夢解才德兼備而御史臺亦抗章薦其廉能久之江陰饑行省委夢解振之夢解不爲文具所活數萬人南臺治書侍御史苟宗道復舉上聞除同知桂陽路事擢廣西肅政廉訪副使故事煙瘴之地行部者多不躬至夢解咸遍歷焉遂按問藤賓二路達魯花赤及諸

貪官姦吏置於法者八十餘人又平反邕州黃震被誣贓罪及藤州唐氏被誣殺夫二冤獄大德初徙江西臨江路總管李侗貪墨狼籍內有依附控持省憲夢解按其贓罪一道澄清久之除廣東肅政廉訪使以病致仕卒夢解博學洽聞著述在藝文志嘗自號魯山天下稱爲魯山先生陸屋字仁重江陰人自幼以孝友聞與夢解齊名御史鄭鵬南嘗以二人竝薦丞相伯顏奏授同知徽州總管府事以廉能擢至臺憲累遷至浙西肅政廉訪使所至以黜賊吏洗冤獄爲己任又嘗奏免儒役及舉行江浙助役法俱見稱於時卒謚曰莊簡

張毅字彥宏河南洛陽人也大德末尹績溪值歲饑民且爲亂毅覺之禽其魁治之分賑有法又爲均徭役以貧富第高下列於簿帳邑民以蘇邑孔子廟壞又無田以食師生毅新廟學復出俸錢

率僚友及邑富儒買田供祭祀膳餐文教興矣國制用中原兵戍江南而兵民異屬萬戶以下輒恃世守凌轢有司欺細民其羣聚爲虐有司不敢問也邑戍卒許來孫尤橫暴毅聞遣語其長曰若兵爲凶虐速械以來則罪止其身否則具若姓名以御眾無紀律上諸憲司二者若自擇之其長惶恐縛來孫伏辜邑有吏以贓去居里中無以生輒嗾民爲訟佐之請謁毅捕而杖之塗其門爲赤方大書識其惡豪猾屏息又嘗出郊見死比丘棄谿中未得主名忽羊角風起毅曰此必異物憑也若有靈耶期三日必獲殺若者已而獲其寺主僧普成則死者爲慧能因竊普成私藏而殺之也遂論如法有虎入境多食人畧甯不能制毅禱於神遂有彪來食虎虎悉駭以去後以課最入爲省僚累官左司郎中鯁亮言天下事以忤丞相鐵木迭兒黜徐復起參議省事泰定中出參知江浙

政事

卜天璋字君章河南洛陽人也父世昌仕金爲河南孔目官憲宗時歸國擢眞定管民萬戶後家於汴天璋幼穎悟長負直氣至元中爲南京府史河南按察使程思廉察其賢辟爲憲府令史久之爲中臺掾有侍御史倚勢貪橫御史發其贓天璋主文牘未及奏先爲所譖俱拘內廷御史對食悲哽天璋問其故御史曰吾老惟一女心憐之聞吾繫不食數日矣是以悲也天璋曰死職義也奈何爲兒女子泣耶御史慙謝俄見原免大德時丞相合剌合孫當國擢掾中書爲提控嘗力辨可否他相怒哈刺哈孫獨亟稱之多從其議尋授工部主事樞密使暗伯薦爲都事贊其府秩滿當代奏留之以代者爲增員武宗時尚書省立遷刑部郎中適盜賊充斥時議犯者竝家屬咸服青衣巾以別民伍天璋曰赭衣塞路秦

弊也尙足法耶相悟而止尙書省臣得罪仁宗召天璋入見時興聖太后在坐帝指曰此不貪賄卜天璋也又曰先朝以謝仲和爲尙書皆朕親薦也汝宜奉職無怠賜酒兼錦衣三襲皇慶初出知歸德府勸農興學復河渠河患遂弭時有盜據要津商旅不通天璋禽數百人悉磔以徇盜爲止息遷浙西廉訪副使以更田制改饒州總管天璋聽民自實事無苛擾民大悅版籍爲清時省臣董田事妄作威福郡縣爭賂之覲免譴饒獨否省臣惡之將中以危法求其罪無所得縣以饑告天璋不待請而發廩亦不憂罪責也火延饒之東門天璋具衣冠向火拜遂熄鳴山有虎爲暴天璋移文山神立捕獲之以治最遷廣東廉訪使初豪民沿海築堰專商舶以射利歷任得賄置不問天璋至卽決去之尋乞致仕歸以餘祿施其族黨家無甑儲晏如也至順二年卒贈通議大夫禮部尙

書上輕車都尉河南郡侯諡曰正獻

劉德溫字純甫大都大興人也始爲中書省宣使累遷同知大都路總管府事改同知上都留守司事時省檄和羅民糧民以價不時得遞相觀望德溫下令曰糧入價出吏敢爲弊者罪之於是糧不踰期而集轉大司農丞耕籍之禮取具一時德溫欲考訂典禮集爲成書未就俄授永平總管永平當天歷兵革之餘野無居民德溫爲政一年而戶口增倉廩實遂興學校以育人才庶事畢舉歲大旱禱而雨歲以不歉灤漆二水爲害有司歲發民築隄德溫曰流亡始集而又役之是重困吾民也遂罷其役而水亦不復至有豪民武斷於鄉里前吏莫敢治德溫按得其罪論如法杖之書其過於門後竟以不道伏誅永平古孤竹國也國初郡守阿台立夷齊廟然祀禮未具德溫請命有司春秋具牢醴致祭從之著爲

式賜廟額曰聖清士論韙之至順間卒贈正議大夫禮部尙書上輕車都尉彭城郡侯諡曰清惠

諳都刺字瑞芝凱烈氏祖阿思蘭仕至冀甯路達魯花赤子孫因其名蘭爲氏諳都刺通經史兼習諸國語成宗時爲翰林院札爾里赤職書制誥會有旨命書藩王添力聖旨諳都刺曰此旨非惟有虧國體行且爲民殃矣帝聞之謂近臣曰小吏如此真難得也事乃止尋授應奉翰林文字凡蒙古傳記多所校正除遼州達魯花赤以政聞賜上尊名幣至順初移襄陽路山西大饑河南行省恐流民入境爲變檄守武關諳都刺驗其良民輒聽度關吏恐違上命諳都刺曰吾防姦耳非讐良民也旣又煮粥以食之所活數萬人襄陽城臨漢水歲有水患爲築長隄水遂無虞元統二年除益都總管俗頗悍黠而諳都刺務興學校以平易治之有馬賊白

書劫人久不能捕詣都刺生禽之其黨賂宣慰使誣以枉勘縱其賊既而往劫河間復被獲誣始白俾任再考親王買奴鎮益都其府屬病民詣都刺裁抑之民以無擾至正六年卒子燮徹堅同知新喻州事以孝稱是時有合刺普華者蒙古人也官台州達魯花赤移徽州嘗喜挾方策攜一羊皮坐於山水勝處歌詠終日見野老輒呼而問民間疾苦以德爲化嘗曰法所以防姦也事苟集法豈必盡用哉三州之民化之幾於無訟考績爲天下最合刺普華嘗學於許謙人以爲學道愛人之驗也

楊景行字賢可吉安太和州人也延祐二年成進士授會昌州判官會昌民素不知井飲汲於河流故多疾厲不知陶瓦以茅覆屋故多火災景行乃教民穿井陶瓦免於災厲豪民號十虎悉捕置法乃創學舍禮師儒置田以膳士絃誦遂盛調判永新州郡府檄

覈民田租一剗宿弊改江西行省照磨轉宜黃縣尹撫州路總管府推官發擿奸伏郡無冤獄金溪奸民陶甲屢誣陷其縣長吏官吏畏之不敢詰甲遂暴橫一郡景行至以法痛繩之徙五百里外金溪僧雲住發人家墓取財物事覺官吏受賕緩其獄景行急按之卒治如法豪猾屏迹所歷州縣皆有惠政後以翰林待制致仕年七十四卒

干文傳字壽道平江人也少嗜學十歲能屬文用薦爲吳及金壇教諭饒州慈湖山長延祐二年登進士乙科授同知昌國州事歷尹長洲烏程縣知婺源吳江州文傳治民能篤恩信始至昌國海島之民頑獷不易治至有剽掠海中若化外者然亦爲之變俗初長官強愎自恣文傳推誠以待之久乃自屈服鹽場官方倚轉運司勢虐使州民家業破蕩文傳語同列曰吾屬受天子命以牧此

民可坐視而弗救乎乃亟爲陳理上官莫敢奪民賴以免長洲爲文傳鄉邑文傳徙榻公署無事未嘗輒出而親舊莫敢通私謁會創行助役法凡民田百畝令以三畝入官爲受役者之助行省又委文傳以無錫華亭上海事文傳諭豪家大姓以腴田來歸中人家自是不病於役其在烏程有富民張甲妻王氏無子納一妾於外生子未晬王誘妾以兒來遂逐妾殺兒焚之文傳發其事得死兒餘骨王厚賄妾父買鄰兒謂妾所生實不死文傳令妾乳兒兒啼不就乳妾父吐實遽呼鄰婦至兒見之躍入其懷王遂伏辜丹徒民有二弟共殺其姊者獄久不決臺司檄文傳鞫之具得其情其母乞貸二子爲終養文傳謂不可以情曲法仍坐爲首者死婺源俗男女婚聘後富則渝約有育女至老死不嫁者親喪貧則不舉有停柩累世不葬者文傳下車召耆老以禮訓告閱二月而

婚葬俱畢宋儒朱熹上世居婺源故業已失文傳諭而歸之卽其故宅建祠俾朱氏世守有富民江丙出游京師娶娼張氏爲婦無何客死張走數千里返其柩以葬前妻之子虐而殺之官司知之利其賄不問文傳執而論如法文傳氣貌充偉文章雅正而生平以政事名浙西僉憲韓鏞舉文傳治行最至正三年召赴闕預修宋史擢集賢待制以禮部尙書致仕年七十八卒

雷機字子樞建甯建安人也年弱冠薦授邵武教諭延祐五年成進士歷古田丞延平路知事有能聲沙縣富民沒子幼族強暴欲據其產上下吏皆通賄獄久弗決機鞫之而白改邵武經歷遇獄有不平獨庭辯不少屈調興化縣尹轉延平推官汀州羅天麟作亂機立保冊集丁壯盜不敢犯徙惠安縣尹賦役均平振興學校以禮讓化俗代還民立祠樹碑鄉井幾徧遷汀州推官築城開濠

以資保障廉訪僉事申屠駟行部至境稔知機賢凡頌牒悉委之年七十乞休除翰林待制致仕機性好學與弟拱杭俱以易名號雷氏易杭在忠節傳

林興祖字宗起福州羅源人也至治二年成進士三遷知鉛山州鉛山豪民吳友文以造偽鈔致富遠至江淮幽薊莫不行使友文既奸黠悍鷲又分遣惡少年四五十人爲吏於有司伺有欲告者輒先誣以事前後戕人甚眾又奪人妻女十一人爲妾民銜冤不敢訴者十餘年興祖至曰此而不除何以牧民卽張榜募民首告偽鈔俄有告者至陽以不實斥去之又有告偽造二人竝贓者鞠之款服友文自至官營掠興祖併執之須臾訴冤者百餘人擇其重者一二事訊之獄立具逮捕其黨二百餘人悉寘之法政聲藉甚江浙丞相別兒怯不花薦諸朝至正八年遷道州路總管方至

撞賊將犯城矣時湖南副使哈刺帖木兒屯城下聞賊至以乏軍需欲退兵興祖夜詣說留之哈刺帖木兒曰明日得鈔五千錠桐盾五百乃可破賊興祖許之入城視事卽勸諸商貸鈔五千錠而取郡樓舊桐板爲盾日中皆備哈刺帖木兒大喜卽留爲城守賊聞新總管至一日具五百盾以爲大軍且至中夕遁去永明洞徭屢竊發興祖以手牘諭之皆曰林總管廉而愛民不可犯也三年不入境春旱蟲食麥苗興祖爲文禱於天大雨三日蟲死而麥稔已而罷典作振貧乏輕徭薄斂郡中大治考課第一以老致仕終於家

周自強字剛善臨江新喻人也好學能文練吏事以文法推擇爲吏泰定閒廣西洞徭反自強往見其酋說以禍福中其要害卽罷兵納款事聞於朝超授兩江宣慰司都事再遷義烏縣尹自強周

知民情而寬厚不爲刻深民有以爭頌訴於廷者一見卽能知其曲直然不遽加刑必反覆開譬之能悔悟首實則原其罪必怙惡不悛然後繩以法民畏且愛獄訟頓息民間田畝之籍多失實以故差徭不平自強出令履畝覈之豪猾不能欺於是賦役均平部使者數以廉能譽於朝以江州總管致仕卒

白景亮字明甫南陽人也明法律善書算初爲征東行省譯史累遷衢州總管先是爲郡者於民間徭役不盡校田畝爲則吏得高下其手貧乏不勝者多破產失業景亮知其弊始覈驗田畝役之輕重一視田之多寡民不勞而事集郡學政久弛從祀諸賢無塑像諸生無廩給祭服祭器有缺景亮皆爲之備儒風大振性廉介自奉甚薄妻尤儉約惟以脫粟共飯部使者上其事下詔褒美改台州總管卒官其時益都蘇濟汝舟尹涇縣亦浚渠均賦修學宮

鑄祭器復浮屠氏侵田以餽諸生百姓歌之曰四民藝業通縣官有蘇公三載民無憂賴有蘇汝舟其被愛戴如此

王良字止善紹興諸暨人也始爲淮東廉訪司書吏遷淮西會例革南士就爲吏於兩淮都轉運鹽司久之累辟爲江浙行省掾史會朝廷復立諸市舶司良從省官至泉州建言買舊有之船付舶商則費省而工益集且可杜官吏措克弊中書省如其言凡爲船六艘省官錢五十餘萬緡歷建德縣尹除兩浙運鹽司經歷紹興總管王克敬以郡中計口授鹽民困於誅求乞減鹽五千引運使弗從及克敬爲運使首議減紹興引額眾猶泥舊良毅然曰民實寡而強曰多今死徙已眾奈何重改民籍而輕棄民命乎且浙西諸郡商賈輻湊未嘗以口計也曷移其賦散於商旅之所聚於是議歲減紹興食鹽五千六百引遷漕運萬戶府經歷紹興官糧入

海運者十萬石城距海十八里歲拘民船備短送及至海次主運者不卽受多致耗缺良曰運戶既有官賦之直何復爲此紛紛也乃責其載糧入運船船爲風雨所敗者例覈實除其數良取吏牘披閱卽除其糧五萬三千石鈔二百五十萬緡遷檢校江浙有詣中書訟松江富民匿湖田沙蕩宜設官追取其糧行省遣良驗視良反覆辨其誑且謂輕聽擾民非國家培養根本之策事遂寢除江西行省左右司員外郎安福小吏誣富民包隱田租九千餘石株連至千家數遣官按問無實良言是州之糧比原額已增豈復有欺隱詭寄者行省用良言悉蠲之在任歲餘以淮東道廉訪副使致仕

盧琦字希韓泉州惠安人也至正二年成進士稍遷至永春縣尹始至振饑饉止橫斂均賦役減口鹽百餘引蠲包銀榷鐵之無徵者乃新學宮延師儒課子弟文風翕然鄰邑仙遊盜發琦適在邑境盜遙見迎拜曰此永春大夫也爲大夫百姓何幸乎吾邑長乃以暴毒驅我至此琦因立馬開諭眾皆投刃槩請縛其首以自新琦爲縛送帥府自是威惠行於境外逾歲泉郡大饑民多就食永春琦命分諸浮屠及大家爲糜食之存活不可勝計安溪寇數萬來襲城琦召邑民諭曰汝等能戰則與城俱存不能則我當獨死眾皆奮曰赤子忍以父母遺賊耶且方將虜掠我妻子焚毀我室家矣因踴躍爭進大敗之大小三十餘戰大有所獲賊遂遁去後調甯德縣尹歷漕司提舉除平陽州命下而卒琦能爲詩亦以清韻稱著述在藝文志

鄒伯顏字從吉高唐州人也始爲崇安縣尹崇安區分五十都爲糧六千石大家以五十餘家而兼五千石細民以四百餘家而合

元書 卷九十一
一千石有司嘗以細民配大家之役伯顏以其不均乃按糧籍悉以糧之多寡受役貧民始得休息邑有宋趙抃所鑿溝溉田數千畝歲久溝堙伯顏修長溝十里繞楓樹陂悉復故蹟而田得常稔安慶路得造偽鈔者遣卒械囚至求其黨囚與卒謀將肆虐良民家伯顏捕訊得其狀卽執而歸諸安慶自是偽鈔之連逮無濫及崇安者後調漳州路判官

許義夫濟甯碭山人也爲夏縣尹每親詣鄉社教民力穡見民勤者出己俸賞之惰者示以罰不三年境內饒足調尹封邱至正中郡饑盜羣起義夫聞賊至近郊卽單騎出迎之語曰封邱邑小而貧民已駭竄幸無入吾境言辭誠款賊遂他往縣賴以安

陳麟字文昭温州永嘉人也事親孝嘗割股療父疾至順中成進士尹慈溪就學於趙偕得其要旨其爲吏善通下情自薦紳先生

及寓公以至父老時時咨訪又倣古爲飭筩虛中而穴其上置諸庭令民投書其中大嵐三女峯歲貢茶所謂十二雷者也有司緣爲蠹麟計其常額平價市之山中以蘇鳴鶴鄉有界塘與姚江接每霖潦江水至大塘輒潰麟於塘五尺外榷木籠竹加土甃石自是無水患轉運司禁瀕海之私鬻鹽者杖而斂足以徒麟言於有司聽民相貿易高士大隱楊先生墓在南山歲久夷其封麟正其塋域植碣表之尤以教化爲重民服其教皆知有恥論者以爲自來慈溪第一循吏於時沿海被兵麟與紹興路錄事司達魯花赤邁里古思同知餘姚州事禿堅皆練民爲兵以保境盜起輒誅之民賴以安遷權浙東副元帥仍領慈溪而三人皆爲時所忌方國珍已破昌國奉化入鄞使人要麟相見麟知孤特無援力不敵欲以說動之乃往見國珍國珍以兵脅其降麟正色責曰吾不欲以

兩虎相鬪使民塗炭故隻身來殺我非勇也國珍愧謝過然終畏
之置之海上岱山麟卽稱足疾扶杖著道士服治田葺園種植自
給地故有岱山書院麟重興之與山中弟子講學陳籩籩爵尊升
降揖讓如鄉飲酒禮父老因名其臺曰陳公臺沿海劫掠者相戒
無登此山尙書貢師泰督理閩中鹽賦以麟爲戶部主事副之尋
命知瑞安州國珍留不遣廓擴帖木兒承旨授秘書監丞參其軍
亦不能赴拘海上十年移入鄞又三年而國珍亡乃南游閩中卒
論曰自唐以來吏治亦衰矣彼重內而輕外豪傑輒有疏遠之歎
民社未足以繫其心故也故盡心民事亦二三賢者而已何則其
習然也元時國人不知愛民爲何事而良吏能行其志亦足多矣
然惟其能亦足以知其難矣人無所瞻徇無內無外潔己愛人則
南山有臺夫何以遂寂寂哉

門人曾士淑詩

門人曾士淑詩

申敬

本

元書卷九十

李欽堂
 申靖濤 刊
 門人曾傳銳襄校
 門人曾士琮詳校

元書卷九十一

隱逸列傳第六十六上

邵陽曾廉撰

昔漢范升奏毀周黨曰臣聞堯不須許由巢父而建號天下周不待伯夷叔齊而王道以成黨等蒙受厚恩使者三聘乃肯就車及見帝廷黨不以禮屈伏而不謁偃蹇驕悍同時俱逝黨等文不能演義武不能死君釣采華名庶幾三公之位臣願與坐雲臺之下考試圖書之道不如臣言伏虛妄之罪而敢私竊虛名誇上求高皆大不敬嗚呼信如升言是肥遯不如冥升而作者為妄作也余考論語載儀封人晨門荷蕢接輿沮溺丈人行事邈乎與孔子異矣子路之言以為人當明君臣之義潔身而不可亂倫也然又記逸民伯夷叔齊虞仲夷逸朱張柳下惠少連孔子高夷齊之不降

辱復稱惠連曰言中倫行中慮虞夷曰身中清廢中權何哉嗚呼
立天之道曰陰與陽未有陰而無陽者也未有陽而無陰者也蓋
下之有待乎上與上之有待乎下一也上以交下爲禮故地上天
下謂之泰下以不屈爲節故天上地下謂之否龍過高則亢亢者
悔之道也晉以摧爲正摧雖罔乎裕之道也故孟子曰用下敬上
謂之貴貴用上敬下謂之尊賢貴貴莫如忠君尊賢莫如下士士
尊則天下尊天下尊則朝廷尊朝廷尊則不賞而民勸不怒而民
威不賞而勸不怒而威則無爲而治也如此而不王者未之有也
士卑則天下卑天下卑則朝廷卑朝廷卑則賞之而不勸刑之而
不沮賞之不勸刑之不沮則君虛位乎上而國非其國矣如此而
不亡者未之有也大哉漢光武之言曰自古聖帝明王必有不賓
之士亦各有志焉說者以爲東漢風俗之盛至於桓靈之間朝綱

日凌中智以下莫不審其崩離而權強之臣息其闕盜之謀豪俊
之夫屈於鄙生之議皆自光武鼓勵士氣有以致之亶其然乎夫
大有爲之君必有不召之臣盛明之世必有不懷爵祿之士而况
際乎天地閉者乎元興勝國故臣遺老固守蓬廬所在而有謝朝
王炎午鄭思肖英風壯魄抗志彌厲當是時科舉未開國人之薄
儒術奚啻土芥自世祖詔褒張特立從容以全杜瑛方逢辰汪夢
斗之節加以禁網疏闊人行其志於是士氣奮興多務潛修而捐
門戶惜氣類呂微之吾邱衍褚師秀皆寄身破屋傲睨公卿貫雲
石遂以勳貴舊家脫屣千乘流風所被至於山巔海澨騷人墨客
莫不開舍結社講學論文矜風雅矣迹其棲遲衡門倚湖山而挹
風月舒懷醉歌雍雍乎有文酒之樂而無孜孜利祿之心其諸知
希益貴者乎天下旣以風雅相尚故人皆忘其貧賤而好高蹈非

元書 卷九十一 二
盡干譽亦足以立名也運會凌遲顧瑛張介福戴道顯蔣大德之
倫氣震草竊楊維禎李祁舒頤貢性之丁鶴年之流皆不臣異代
王冕戴良至以死拒不易其操則亦獲下士之效矣吾懼乎世人
不察乎此猶執范升之議而猥謂隱士徒私竊虛名爲無用乎天
下而虛負人君之謙降也蓋徒知子路策丈人之意而不知聖人
所以表逸民之情也故易曰不事王侯志可則也肥遯無不利無
所疑也蠱無可幹則託志肥遯固聖人所許也天下之禍莫大於
使人無名之可好天地定位昭昭宙合何嫌何疑而欲挫士節以
彰其大哉必欲驚行墀陛旅進旅退羔裘逍遙赤芾充位其文德
武略果何如也蓋人至名無可好則人不知清濁之爲清濁也於
是乎諾諾庸庸行路君父俄且仇讎其主貨鬻其國儼然而曾莫
之恤也何則潔污等夷而人何必其潔榮辱迥異而人何憚不榮

也此惜以虛名予人之過也孰知乎世祖之善全人之節乃所以
自成其人之節以爲國家光哉余美夫元時人士皆競於文學而
不競於祿仕而明其有由來也乃錄自金宋入元下至末造凡百
餘人爲隱逸傳其有已入明史復具載者蓋晉書陶潛之例也
李俊民字用章澤州人也通河南程氏學金承安五年進士第一
授應奉翰林文字尋棄官教授鄉里南遷後隱於嵩山徙懷州復
隱西山自號鶴鳴老人世祖在藩劉秉忠盛稱之以安車召見延
訪無虛日遽乞歸山卒世以爲抗志遯荒詩中於入元後止書甲
子傲陶潛也中統初賜諡莊靜先生

張特立字子舉曹州東明人也金泰和二年進士累官監察御史
以讜直爲執政所擠遂歸田里前事具金史循吏傳特立旣去國
以程氏易教授諸生東平帥嚴實每加禮焉定宗元年世祖在藩

以書褒特立曰前監察御史張特立養素邱園易代如一年幾七十研究聖經宜錫嘉名以光潛德可特賜號曰中庸先生又曰先生年老目病不能就道故令趙璧諭意竝名其讀書之堂曰麗澤憲宗二年復褒以書曰白首窮經誨人不倦無過不及學者宗之昔已錫嘉名今復諭意明年特立卒年七十五中統二年詔曰中庸先生學有淵源行無瑕玷雖經喪亂不改故常未遂邱園之賁俄與窳窳之悲可復賜前號以光寵數

曹之謙字益甫雲中應人也幼知力學金季成進士與元好問同爲左司掾機務倥傯商訂文字未嘗少輟金亡好問首爲河南倡正學是時之謙與好問及張字彥升陳賡子颺賡弟庾子京房皞希白段克己復之弟成己誠之麻革信之一時雅合竝以詩鳴之謙隱居平陽三十餘年乃卒好問嘗與張德輝見世祖於潛邸請

世祖爲儒教大宗師又嘗上耶律楚材書請以一寺觀費養天下名士憲宗七年卒然在元幾三十年亦未嘗仕事在金史文藝傳大德間大同授教房祺纂錄諸人詩編集成帙號曰河汾諸老集其時長清杜仁傑仲梁嘗與麻革詩名相埒至元閒屢徵不起仁傑性善謔才宏學博平生復與李獻能冀禹錫相友善元好問亦亟稱之革在文苑傳克己稷山人幼時與成己竝以才鳴金禮部尙書趙秉文書雙飛名其里金末以進士貢成己正大閒授宜陽主簿國變後兄弟避地龍門山元初起成己爲平陽儒學提舉堅拒不赴二十餘年卒學者稱菊軒先生

杜瑛字文玉霸州信安人也父時昇在金史隱逸傳瑛長七尺美鬚髯氣貌魁偉從父渡河居緱氏山中閒關轉徙教授汾晉閒後留居相州憲宗九年世祖南伐過相召問計瑛從容對曰漢唐以

還人君所恃以爲國者法與兵食二者而已國無法不立人無食不生亂無兵不守今宋皆蔑之殆將亡矣興之在主上若控襄樊之師委戈下流以擣其背大業可定也世祖大悅欲其從行以疾弗果中統初詔徵瑛辭不就張文謙宣撫河北奏提舉懷孟彰德大名學校又辭而遣執政書曰先王之道不明異端邪說害之也橫流奔放天理不絕如綫今天子神聖俊乂輻湊言納計用先王之禮樂教化興明修復此其時矣若夫簿書期會文法末節漢唐猶不屑也執事者因陋就簡此焉是務良可惜也夫善始者未必善終今不能溯流求源明法正俗育才興化以拯數百千年之禍僕恐後日之禍將有不可勝言者矣人或勉之仕則曰後世去古雖遠而先王之所設施本末先後猶可考見故爲政者莫先於復古苟因襲陋習以求合於先王之法不亦難乎吾不能隨時俯仰

以赴機會將焉用仕於是杜門著書以終年七十遺命謂子曰吾卽死當表吾墓曰緱山杜處士天祿中贈資德大夫翰林學士上護軍魏郡公諡曰文獻

李治字仁卿號敬齋真定欒城人也登金進士第辟知鈞州事州陷治微服北渡流落忻崞閒聚書環堵人所不堪裕如也世祖知其賢禮致之訪以治道對曰夫治天下蓋有法度則治循名責實則治進君子退小人則治故不過立法度正紀綱而已紀綱者上下相維持法度者賞罰示懲勸今則大官小吏下至編氓皆自縱恣以私害公是無紀綱也有功者未嘗賞有罪者未嘗罰甚則功反獲罪罪反獲寵是無法度也法度廢紀綱壞天下不變亂已爲幸矣又問地震對曰天裂爲陽不足地震爲陰有餘陰太甚則變常今或奸邪在側或女謁盛行或讒慝交至或刑罰失中或征伐

驟舉五者必有一於此矣治晚家元氏鄉人以封龍山中李昉讀書堂故基葺講堂齋舍爲棲生徒世祖卽位復聘至京欲處以清要治以老病懇辭還山至元二年再以學士召勉就職期月治與翰林書曰諸公以英才駿足絕出之學高躡紫清固自其所但非病叟所處官謗可畏也幸而得請木石與居麋鹿與游斯則老叟之所便矣竟辭去卒年八十謚曰文正張德輝元好問嘗就治同游封龍山時人目爲龍山三老德輝自有傳是時劉德淵字道濟順德內邱人中統初亦授翰林待制晚遂棲遲蓬華劉秉忠張文謙以鄉曲義欲周之皆却不受許衡道邢必式閻致恭而去七十有八歲卒鄉人私謚曰卓行先生

方逢辰字君錫嚴州純安人也初名夢魁宋純祐九年進士第一宋主昀爲改名焉未授官二御史以忤丞相鄭清之去國適雷震逢辰上書言明詔以雷發非時避殿減膳恤刑而獨缺求言天下怪之以廟堂爲監謗也所貴乎大臣者以道事君不可則止今君嗣未立土木方興貨臣聚斂敵國陽遁顛而不扶具臣而已矣况累疏乞閒而留之愈堅乃所以招天下之議非所以愛之也尋釋褐僉判平江寶祐元年海州喪師制使賈似道以捷聞逢辰言海州之事三尺童子皆能言之而帥臣抗章以一去恐朝廷是罪甚於楊國忠也萬世之議卽未暇卹四鄰笑我何以立國於是似道之恨逢辰自此始矣二年除校書郎宋主信用宦豎逢辰上言天下有貧州郡而無貧太守有貧家國而無貧邸第南司貧而北司之應奉不貧百姓貧而緇黃之窟宅不貧何也凡挾小才以濟大貪於陛下之近親有憑依焉於宮中有承受焉於左右有游譽焉專恃陛下之好惡喜怒以媒其身陛下曰某也能某也廉或昇麾

或授節曰吾自除吏也而不知西園之諧媚固有從旁而竊威福者矣又曰京師邦家之根本王畿四方之命脈此天下所恃以爲國者也京有尹畿有漕所以使培護根本愛養命脈也今不過爲奄豎一大承受耳無名宣敕眞僞莫詰非時取索隱匿莫稽仇士良教其徒曰天子不可令閒莫若以財貨聲色動其心使不及他事今此曹皇皇汲汲前之藻稅未休後之丹雘又起陛下方以其動適吾意而不知此正士良之策也漕帥疲於應奉之不給帑庫赤立廩如懸磬職此之由萬一畿甸有警未知何以處之也有頃逢辰以元兵方強數言兵事以爲古之人莫窘於淮淝而談笑於弈棋莫迫於新亭而從容於就席此不以急而震天下也然外示談笑內必有以神其指授之略陽示從容隱必有以伐其壁後之謀此則不以暇而思天下也故處急必以暇處暇必以急不然天

下之憂端未艾也夫天下貴自謀不可以鄰國之存亡爲安危貴自備不可以敵國之緩急爲喜懼善爲謀者不依於人善爲備者不制於人不然萬一鄰國陽示安枕以給我而假敵以道臍可噬乎胡不移其揣摩他人而自謀自備乎又曰今與敵對境我無一日謀敵而敵無一日不謀我我之所築土妖血山彼之所築金城鐵壁彼之所築奪我之地爲之我之所築奪民之地爲之又曰備邊之事必爭浮光然後可以全兩淮而保長江必守襄樊然後可以拒光化而全江陵夫淮之猶可守可耕者以有河也今彼涉河而築浮光乃吾戶內若其生聚教訓於斯日夜出騎以撓我淮東西俱不可耕矣故當盡力以爭浮光彼不得以牢其巢而兩淮猶可安枕也襄樊不守則江陵爲孤注豈尙足恃故必以死守襄樊則北可拒光化而南可全江陵也時洪天錫劾內豎不行而去逢

辰貽書宰相勸其行申屠嘉之事又疏言臺臣欲去厲鬼以除膏
肓之疾陛下愛國家反不如二豎乎漢唐之季闔宦罪大惡極朝
廷不能誅天下必有起而誅之者又曰小人所忌憚者在外廷若
外廷攻之而絀則無君之心動矣宋主以其激烈惡之除著作郎
出知甯國府吳潛爲丞相以薦復爲著作郎權左司郎中時宋主
信賈似道中旨與吳潛郡逢辰言天下所同好我獨惡之天下所
同非我獨是之則爲人上者亦難知矣上易知則下親上難知則
下畏下親則上安下畏則上孤窘急而求之一緩而遣之旁觀沮
縮何以作人用事之氣乎宋主稍優容之未幾似道入朝吳潛謫
循州逢辰亦被黜已而除知婺州及嘉興瑞州復以邪黨論罷宋
主禱卽位召爲司封郎兼直舍人院三遷以秘閣修撰提刑江東
信州軍亂或語逢辰宜勿往逢辰單騎入城訪亂卒姓名調諸寨

銳卒禽之一方帖然進集英殿修撰江西轉運副使入權兵部侍
郎兼侍讀轉吏部侍郎賜石峽書院額以憂歸後凡四召至禮部
尙書皆不赴而宋亡矣至元中世祖召御史中丞崔彧起之於家
以疾堅辭不出二十八年卒逢辰所至皆講學純安皆宗陸九淵
獨逢辰以格物爲窮理之本以篤行爲修己之實學者稱爲蛟峯
先生弟逢振字君玉景定進士官至太府寺簿宋亡亦抗節不仕
隱風潭以終逢辰同邑何夢桂號巖叟咸純元年進士仕大理寺
大卿引疾去至元閒累徵不起築室小酉源夢桂成進士出留夢
炎之門入元贈以詩末云白髮門生羞未死青衫留得裏遺尸蓋
諷之也其時牟巖字獻之湖州人父子才傳在宋史巖宋進士仕
大理少卿亦以國亡不仕論者以爲元貞大德之閒年在耄耄歸
然一世文獻爲時所矜式云巖凡閉戶三十六年乃卒子應龍在

文苑傳舒岳祥字舜侯一字景祥甯海人宋寶祐進士少嘗受文法於吳子良子良以爲靈識異稟漢之終賈也宋亡避地奉化終宋承直郎岳祥文學與王應麟齊名戴表元袁桷皆其弟子也表元桷俱入文苑傳又逢辰同郡魏新之字德夫受業於逢辰爲鄞教授宋亡隱逸不出與同里孫潼發皆咸純進士潼發字帝賜仕衢州軍事有廉能聲辟御前軍器所幹辦公事宋亡家亦毀潼發避地萬山中程鉅夫以遺逸薦固辭不出又有與岳祥避地奉化者天台劉莊孫字正仲學業宏通亦子良弟子也

汪夢斗號杏山徽州績溪人也宋景定閒以明經發解江東漕試授江東制司幕官咸純初遷史館編校與葉李等議上書劾丞相賈似道李等坐罪夢斗亦遁歸宋亡尙書謝昌元薦夢斗於朝世祖特召赴闕堅不受官放還是時富陽朱清元之與葉李爲同門

生李以斥賈似道竄漳州朋從莫敢往省清獨往與之訣且爲具飲食服用之需俾所親護送出二千里外及李免歸清候之江上惟勉以益自策勵而已及李居左揆人多趨附清遂漠然李數遣人迎致之卒不往以布衣終人稱爲東山先生又有吳大有嵎人宋寶祐中爲太學生率諸生上書言賈似道奸狀不報遂退游湖上與林昉仇遠等六七人詩酒相娛時以比竹林七賢元初辟爲國子檢閱不赴卒葬戴容墓左又宗必經字子文南昌人景定三年進士通判瑞州宋亡尙書留夢炎侍御史程鉅夫交薦固辭械至燕繫獄三歲亦放還時又有臨江杜文甫錢唐厲元吉武陵丁易東分水何逢原江山柴望華亭衛宗武新喻黎立武婺源胡次焱宜黃鄒次陳莆田黃仲元皆宋故官也文甫中宋咸純進士德祐初除國子博士宋亡趙與票薦於翰林程鉅夫以詔宣召辭疾

不起自號南峯山民元吉字无咎宋進士爲烏程尉退歸隱從山
至元時訪求故宋遺民欲授以官元吉遂遜跡湖海白首始歸易
東字漢臣號石潭善易宋季進士累官樞密編修入元教授鄉里
數徵不起逢原字文瀾宋中書舍人至元中徵授福建儒學提舉
不赴柴望字仲山宋國史編校官入元不仕而終望從弟隨亨瞻
配元亨吉甫同登宋進士第隨亨歷知建昌軍事元亨官荆湖參
制元彪字炳中號澤耀居士歷觀察推官均以易遁跡人稱柴氏
四隱宗武字淇父自號九山宋純祐開歷官尚書郎出知常州罷
歸隱居三十餘載至元二十六年乃卒立武字子常咸純進士亦
隱居三十餘年以終次焱字濟鼎咸純進士授湖口主簿宋亡微
服歸教授鄉里或勸之仕作媒問嫠嫠荅媒以見志次陳字用弼
宋季中博學宏詞科仲元字淵叟宋國子監簿皆入元不仕

謝翱字舉羽一字舉父福州長溪人也父鑰通春秋朝世其學宋
末試進士不第爲人倜儻有大節會丞相文天祥開府延平長揖
軍門署諮議參軍已復別去及天祥被執以死翱悲不能禁隻影
行浙水東時會稽王英孫才翁山陰徐天祐受之竝爲衣冠避亂
者所宗天祐宋國子監書庫官英孫宋將作監主簿故端明殿學
士克謙子也翱主英孫二歲會西僧楊連真珈發宋諸陵欲以骨
建塔林景熙者字德陽亦曰景曦温州平陽人宋咸純七年太學
釋褐官禮部架閣轉從仕郎時寓紹興與郡人唐珏友善翱所結
汐社中人也珏字玉潛號菊山與景熙易骨而葬之蘭亭山南移
常朝殿冬青植其上其事甚秘遇寒食則相與祭冬青樹下識者
歎其忠義好事者至撰爲別傳言珏被天眷夢授以妻子田宅云
其時預易骨者王英孫持其議景熙邑人鄭樸翁宗仁襄其役而

爲之籌畫者朝也朝復之浦江館於吳涓涓字清翁號潛齋故義
烏令退居吳溪延邑人方鳳永康吳思齊及朝開月泉吟社遂合
汐社爲一晝夜吟詩不自休學者皆翕然從之又西至睦復入杭
慕屈原懷郢託興遠游自號晞髮子後復寓浦江其冬過嚴陵灘
登西臺設文天祥主再拜伏酌號痛者三乃以竹如意擊石作楚
歌招魂之詞曰魂來兮何極魂去兮江水黑化爲朱鳥兮其味焉
食歌畢竹石俱碎失聲哭遂作西臺慟哭記然多度詞稱文天祥
謂是唐宰相魯公也已又得方干舊隱處於釣臺南曰白雲原顧
其徒曰死必葬我於此至元二十三年去家武林西湖上明年肺
疾作瀕死屬曰吾去鄉千里慎收吾文及骨付韶父子善也旣而
鳳思齊等至瘞之向所示葬處而伐石表曰越謝朝墓以遺文殉
焉無子弟子吳貴祠之月泉書院貴吳涓孫也韶父方鳳字子善

思齊字也鳳一字景山生有英才常出游臨安盡交海內知名士
宋將作丞方洪奇其才以族子試任國子監舉上禮部不中第主
閤門舍人王斌家教其二子大小登後以特恩授容州文學宋亡
遂肆爲汗漫游一日復至杭大登爲暹國臣入使於元相持泣下
鳳欲與俱行人勸止之臨沒屬其子樗題銘旌曰容州示不忘宋
也鳳善詩兼通毛鄭文章主真正以爲非是則腐爛漫漶當與東
華塵土俱盡性不喜佛老壯唐傅奕爲人據奕後闢異端數十事
題曰正人心黃潛柳貫吳萊皆出其門時稱爲巖南先生樗字壽
父亦能詩思齊祖深先居麗水深有奇才宋建康府判官陳亮妻
以女遂家永康父邃知廣德軍思齊性穎悟少卽倣父爲古文以
任子入官調嘉興丞數以書與用事者言賈似道母喪不宜用鹵
簿又言御史俞浙以論謝堂去職宰相附貴戚塞言路如朝廷何

不見用宋亡隱浦江家無儋石之儲有勸之仕者輒謝之自號全歸子年六十四手編聖賢順正之事曰俟命錄賦詩別諸友遂卒時又有鄧牧字牧心錢唐人宋亡不仕至元二十四年入洞霄止於超然館沈介爲營白鹿山房居之牧嘗爲謝翱傳爲周密蠟屐集序翱之卒適牧出游翱詩有曰謝豹花開桑葉齊戴勝芊生藥草肥九鎖山人歸不歸九鎖山人牧別號也牧作詩似罕言興亡而實侘傺幽憂不能自己故發爲世外放曠之談古初荒遠之論世咸悲之又楊子祥字吉甫餘姚人宋江萬里舉爲縣監稅輒棄去教授海濱元初留夢炎欲薦之不顧方鄧牧謝翱方鳳思齊在臨安相與弔古尋幽放情詩酒復有欲薦此數人者子祥遂歸餘姚杜門著書垂三十年乃卒

趙孟堅字子固宋主昚兄伯圭元孫也居海鹽寶慶二年成進士

累官集英修撰知嚴州平反張均報父讐獄遷翰林學士宋亡隱居廣陳鎮修雅博識性復高峻趙孟頫其從弟也孟頫旣仕元貴顯孟堅恥之閉門不肯與見其妻爲之言乃見之問曰弁山笠澤佳否孟頫曰佳曰弟奈此山澤佳何孟頫退命滌其坐生平雅負晉宋閒標韻東西游適一舟橫陳雅玩意到吟弄至忘寢食海鹽尹宣城梅黻造舟謁之竟飛棹去黻佇立曰先生所謂名可聞人不可見者歟嘗得五字不損本蘭亭喜極乘夜至弁山下大風覆舟孟堅立淺水中持蘭亭示人曰帖在此餘不足問時好事每各攜書畫放舟湖上相與評賞孟堅脫帽以酒濡髮箕踞歌離騷旁若無人薄暮入西泠掠棹茂樹閒指林麓最幽處絕叫曰此是洪谷子董北苑得意筆也鄰舟皆駭絕以爲真謫仙人又善水墨白描水仙梅蘭山簪竹石有梅譜傳世自號彝齋居士識者知其託

迹肥遯也卒年九十七或曰孟堅在宋純祐初卒孟頫仕元孟堅不及見也周密字公謹亦與謝翱鄧牧友善本湖州人後依杭州楊大受承之大受和王沂中諸孫嘗引外湖水以流觴而引密居其室西偏故密又爲錢唐人宋寶祐閒嘗爲義烏令入元不仕自號四水潛夫以湖有霅溪四水交流也亦曰草窗先生多放浪山水閒善爲詩兼有論著每述宋亡之由多追咎韓賈有彼何人哉之感亦工畫人皆寶之是時又有張炎字叔夏亦家臨安入元不出以樂曲自放循王俊五世孫也

鄭思肖字憶翁號所南福州建江人也祖咸枝江主簿父震宋純祐中爲安定和靖書院山長思肖初入太學應博學宏詞科國兵南下扣闕上宋太后幼主疏切直忤當路不報宋亡遂隱不仕亦不復娶因更名思肖以戰國策故書趙爲肖言思趙也又扁其室

曰木穴世界言宋世界也嘗贈人云天下皆變吾觀其不變惟其不變乃所以變變者物也不變者道也又云古人重立身今人重養身立身者蓋超乎千古之上與天地周流於不識不知之天養身者惜一粟以活微命役於萬物死於萬變者也何足道哉有田三十畝邑宰素聞其精畫蘭不妄與人因給以賦役取給思肖怒曰吾頭可得蘭不可得宰奇而釋之其畫蘭皆無根或問之曰土屬他人矣晚貨其所居得錢則周人之急田亦捨諸利惟餘數畝爲衣食資仍謂佃客曰我死則汝主之自是無定所吳之名山禪室道宮無不徧歷後寄食城南報國寺坐必南嚮遇歲時伏臘亦輒南嚮野哭再拜人莫識焉誓不與北客交或在友坐上見有語音異卽掩耳亟走去人咸以爲狷介亦不爲異趙孟頫與之善以仕元遂絕孟頫數往候之終不得見歎息而去著有大有無工十空

經造語奇澀自題其後曰臣思省嘔三斗血方能書此後當有巨眼識之者年七十八以壽終

王炎午吉州安福人也初名鼎翁字梅邊宋季爲太學上舍生少年負氣節丞相文天祥舉兵勤王炎午說天祥毀家紆難並購淮卒參錯戎行以訓江廣烏合之眾天祥欲署以戎職以母疾歸及天祥被執當自贛過洪炎午作生祭文張之驛途牆壁冀天祥之見省也其文慷慨悲烈歷陳其可死之義又反覆古今所以死節之道申明己志有云生雖愧陳東報汴之忠死不效陸機入洛之恥爲世傳誦不具錄炎午以國亡遂更名執志不仕事母至孝三十年不懈大德七年母始卒炎午廬墓三年靈龕設遺像以偶出而侍婢燹燭焚其像衣卽見母於夢自是遂家居不他適朝夕饋粥廬陵趙文以書慰之說以愛身養母之義宜開齋禁炎午答書

具謝然未改也時有以炎午遺逸薦之臺省不肯出延祐中以壽終趙必瑒字玉淵宋太宗十世孫居於東莞咸純三年成進士累遷南康丞文天祥辟爲惠州軍事判官入元後隱温塘村以終胡三省字身之一字景參台州天台人也或曰甯海人父篤好史學患鼻衄讀史不休嘗灑血漬書三省博學強記父命之注釋司馬温公通鑑無何其父卒三省甚貧盡瘁家蠱然不敢廢史學後成宋寶祐四年進士游宦遠外有異人異書必就問焉久之參丞相賈似道軍事言不見用似道敗於蕪湖三省聞道歸鄉里至元十三年國兵入臨安分兵徇浙東三省避地新昌師復從之三省以孥還免復還其家旋寓袁氏梅欄雙居因自號爲梅欄初三省爲通鑑廣注依陸德明經典釋文例鑑注別行復著論十篇失於新昌至是重作之乃隨文附著名曰音注資治通鑑二十六年楊

鎮龍反台州閩里大被害三省藏其書窖內得不燬三省嘗受業
王應麟學日益進注通鑑凡經三十年歷困阨亦至多其宏博明
達洞於大略自來注家所未及也會時世移易三省言老成凋謝
莫可就正說者謂當學於北方而吾衰矣隱寓不改所事之意終
宋朝奉郎劉友益字樂三吉安永新人宋亡卜築萬山開杜門不
與世接著通鑑綱目書法研精覃思亦歷三十年乃成揭傒斯贊
之曰百世而下先生此心先生不作山高水深

真山民不知其姓氏宋末竄迹隱淪所至題咏因傳於世或自呼
山民因以稱之或曰名桂芳括蒼人宋末進士真德秀後也又有
友鹿翁亦姓氏莫考或以爲其先祖仕宋爲侍從宋末隱姓名屏
居甯海東北蒼山下不妄交游日與麋鹿相狎故自號友鹿翁云
李直方字德方婺州東陽人也少以世業治尙書宋末舉進士不

第遂隱居教授弟子陳樵胡澗陳士元皆以文學知名晚歲家益
貧與弟子躬耕南山之麓人皆曰龐德公也樵父取青寶祐間抗
章詆賈似道誤國不報歸隱於家自號閒癡翁宋亡丞相伯顏見
其章爲之歎息樵字君采有經濟才至正中遭亂不仕種藥園谷
中有北山別業備水石花竹之趣好以鹿皮爲衣自稱鹿皮子被
薦徵不起其時史公珽字摺叟慶元鄞人也精易理作文典則名
重一時隱居教授數十年程端學薦長甬東書院棄去游西州寄
興吟咏每對人論宋臺閣故事亶亶不倦若談及忠臣義士必慷
慨流涕廣平李堯臣七喪不舉公珽傾橐助之自號蓬廬處士孫
嵩字元京徽州休甯人以薦入太學宋亡隱汝甯山中自號艮山
示不復仕閉門賦詩鍛苦鍊枯淒斷欲絕時婺有制幹許月卿宋
季進士宋亡製齊衰服之以居汪凱其子壻及汪炎昶皆絕意當

世而從嵩游其詩皆悲壯激烈讀者哀之陳仁字同甫茶陵人博
學好古宋咸純末薦漕舉屬國亡絕意仕進營東山書院居之自
號古迂終身不出于石字介卿蘭谿人貌古氣剛然喜談諧善詞
賦自負甚高年三十而宋亡隱居不仕一意於詩豪宕激發因所
居鄉自號紫巖陳巖字清隱青陽人宋咸純末舉進士不第入元
不仕築室高陽河極意嘯歌復徧游九華諸勝優游以終又嘉定
陸正撫州危復之天台潘音皆不受辟命陸正字行正精於律呂
象數之學世祖遣程文海至江南訪求賢士正稱疾不出復與劉
因同徵亦不起以壽終門人私謚曰靖獻先生危復之字見心宋
末爲太學生師事湯漢好易工詩至元初被薦爲本路儒學官不
就朝廷屢遣使以幣徵之皆不起終隱紫霞山中學者謚曰貞白
先生潘音字聲甫自宋季躬耕不仕築室南洲山中至元中亦不

受遺逸之徵以疾卒又張雯字子昭吳人力學構一樓藏書甚富
宋亡已久雯從故老訪遺文舊事終不出仕子田字芸己工詩又
李進字野翁號粹齋崇仁人宋純祐進士福建運管龔廷松貴溪
人宋咸純鄉舉以薦授漢陽教授不就石一鰲字晉卿義烏人宋
鄉貢進士亦皆入元不仕

楊書田 刊

劉世昌 刊

門人曾 校襄校

門人曾士琮詳校

元書卷九十一 上

元書卷九十一

邵陽曾廉撰

隱逸傳第六十六下

劉辰翁字會孟號須溪吉州廬陵人也師事歐陽守道以進士對策言濟邸無後可痛忠臣戕害可傷風節不競可恨宋丞相賈似道惡之置丙第以親老請濂溪書院山長丞相江萬里薦除太學博士固辭宋亡逃之方外辰翁好評論詩文然太傷纖巧所作亦以光怪磊落為宗惟其蹊徑本自蒙莊故多恂恍離奇而寄託遙深實黍離之思也子將孫尚友世其學元祐時官光澤主簿是時宋室遺老逃方外者辰翁同郡鄧光薦錢唐汪元量馬臻董嗣杲臨川雷思齊光薦字中父少負奇氣以詩名登進士第屢薦授官不就後入丞相文天祥幕府贊之勤王挈家入閩一門十二口同

時死兵火中乃從衛王於厓山累官禮部侍郎權直學士厓山潰
光薦再赴海元人援出之得不死元帥張宏範禮待之使教其子
珪尋同文天祥送燕至建康囚天祥於驛而寓光薦於天慶觀得
從黃冠歸天祥賦詩送別天祥嘗與其弟書曰鄧先生真知我心
者也吾銘當以授之未幾卒元量字大有宋主禘時以善琴供奉
掖廷宋亡隨三宮入燕久之爲黃冠南歸往來匡廬彭蠡間常爲
詩以發興亡之感哀思淒動臨安破後事蹟尤詳馬廷鸞劉辰翁
皆以爲詩史延祐後始卒臻字致道號虛中爲詩豪邁俊逸隱西
湖上士大夫慕與之交嗣杲嘗官武康令宋亡入道孤山四聖觀
亦號能詩思齊字齊賢宋亡獨居空山中號空山先生數年後棄
儒服爲道士居烏石觀後終於廣信思齊以善易名又趙孟頫黃
巖人亦爲文天祥從事宋亡爲道士又爲僧白號三教遺逸云是

時又有陳仲微仕爲兵部侍郎宋亡避地卒於安南

龔開字聖與號翠巖淮安淮陰人也宋兩淮制置使監宮嘗與陸
秀夫同居幕府入元不仕適意野放作古隸得漢魏閒筆意山水
師米芾人物師曹霸描法甚粗然性耿介家甚貧立則沮洳坐無
几席一子名浚每令俯伏就背按紙作唐馬圖風髮霧鬣豪骭蘭
筋備極諸態一幅出人輒以數十金易之尤喜爲墨鬼鍾馗等像
奇變自出一家嘗爲文天祥陸秀夫作傳時以爲班固筆也

呂徽之字起猷號六松台州仙居人也宋亡遯跡萬竹山常耕漁
以自給偶攜楮幣至富家易穀種值大雪立門下人弗之顧徐至
庭前聞閣下分韻作雪詩有得滕字者苦吟未就徽之不覺失笑
諸貴游出見其露頂短褐輒侮之詢其見笑之由徽之曰吾意舉
滕王蛺蝶圖耳眾始驚歎邀入坐以藤滕二字請足之卽援筆大

書復請和曇字韻亦立就篇末有云不如乘此禽元濟一洗江南
草木慙方大驚異而微之和畢便出眾疑其爲呂處士也與之穀
怫然曰我豈受不義者必易之刺船而去遣人遙識其處雪晴往
訪之惟草屋一間家徒壁立忽米桶中坐一人乃其妻也試問呂
先生何在荅云溪上捕魚始知眞爲微之矣詣其處方艤舟隔岸
曰諸公盍先到舍遲我乎少頃攜魚換酒至盡歡而別他日復往
躡其蹤則遷居矣一日與治中陳孚遇諸塗孚策蹇驢見微之風
神高節問曰將非呂先生乎曰然遂握手共論驢故事微之舉一
事孚荅一事互至四十餘事孚不能荅微之曰我尙記有出某書
傳者又三十餘事孚深敬之

吾邱衍字子行或止稱吾衍杭州錢唐人也詩善做李賀兼通聲
音律呂之學工隸書尤精小篆嘗自比郭忠恕爲人意氣簡傲褻
玩一世居生花坊一小樓客至僮輒止之通姓名乃始登苟非所
願見卽從樓上遙語曰吾出有閒矣顧彈琴吹洞簫撫弄鐵如意
不輟一日廉訪使徐炎來見衍從樓上呼曰此樓何可當貴人登
耶願明日謁謝使節炎笑而去明日俟之衍竟不往也衍以小學
教從衍游者常數十百人衍坐童子地上使冠者分番下授之時
出小清涼傘教之低昂作舞勢或與賓游談大噱解髮濡酒中爲
戲羣童皆肅容莫敢動衍左目眇又跛一足一俯一仰嫵媚可觀
故高不事之節超然如忘世者又好譏侮文學士獨推重仇遠及
胡長孺兄弟嘗游孤山黃公望吹鐵笛方酣忽又有吹鐵笛自西
湖上者悠然相和則衍也二人各不交談而去時人以爲優於桓
伊云後以買妾致訟遭誚辱不勝忿因詣仇遠別而自沈西泠斷
橋下多寶僧可傳從衍學知其死乃葬衍遺文於後山

褚師秀號雪巖杭州人也以清苦節行聞一日行省平章政事尤玘單騎從一僮至天慶觀自通名姓觀主大驚玘曰我願一見褚高士耳觀主謂其人孤僻士相君何取而欲見之玘意彌堅觀主乃叩門問爲誰觀主曰平章請見師秀曰我自來不識時貴人言訖欲入而回顧平章已拜於地意欲高士延坐其室師秀卽鍵戶偕出廊廡閒至雲臺閒語玘曰三年前有閩州王高士留此某則非其人也因長揖而去玘瞻顧咨嗟而已然師秀嘗與洞霄宮主席周光和杭州釋文珣交亦與周密仇遠相唱和人益重之

貫雲石一曰小雲石海身阿里海身有傳父曰貫只哥附焉雲石以父名貫爲氏自號酸齋母廉氏夜夢神人授以大星吞之遂有娠及生神采秀異年十三三英爽有膂力使健兒驅三惡馬疾馳已持槊立待馬至騰上之越二而跨三運槊生風

觀者辟易稍長折節讀書初襲兩淮萬戶府達魯花赤鎮永州御軍嚴肅然暇輒雅歌投壺不爲形迹拘也忽一日呼弟忽都海身語曰吾生平宦情最薄顧祖父爵不敢不襲今已數年矣願以讓弟卽解金虎符佩之而北從姚燧學燧見其古文峭厲有法及歌行古樂府慷慨激烈大奇之仁宗在東宮聞其讓歎曰將家子有如此賢者乎選爲說書秀才入宿衛仁宗踐阼上書陳六事曰釋邊戍以修文德教太子以正國本設諫官以輔聖德表姓氏以旌勲貴定服色以正風俗舉賢才以恢至道書凡萬餘言未報拜翰林侍讀學士乃喟然歎曰辭尊居卑昔賢所尙今禁林清選與所讓軍資孰高人將議吾後矣遂稱疾還江南詭姓名易服色人無識之者偶過梁山濼見漁父織蘆花爲被欲以絀易之漁父疑其人陽曰君欲吾被當爲賦詩世遂喧傳蘆花被詩雲石旣棄官出

詩文日進然或混屠沽侶漁樵入釋老又嘗賣藥錢唐市榜曰出貨第一人閒快活丸有就買者輒展兩手一大笑示之領其意者亦笑而去其依隱玩世率此類也泰定元年卒年三十九贈中奉大夫集賢學士護軍京兆郡公諡曰文靖子阿思蘭海身官慈利州達魯花赤

武恪字伯威宣德人也初以神童游學江南吳澄爲江西儒學提舉薦入國學明宗在潛邸選恪爲說書秀才及出鎮雲南恪在行明宗欲起兵陝西恪諫曰太子之行於國有君命於家則叔父之命也今欲向京師發一箭史官必書太子反矣左右惡其言乃曰武秀才有母宜歸也恪遂還大都居陋巷教授子弟文宗知其名除秘書監典簿丁內艱再除中瑞司典簿改汾西縣尹遂皆不起或勸之仕恪曰向爲親屈今何爲者也居數歲朝廷選守令泰不

華舉恪尹沁水亦不赴近臣又薦爲授經郎恪遂陽瘖避之恪好讀周易每日堅坐或問曰學以何爲本曰敬爲本學者皆翕然宗之

陳苑字立大信州上饒人也嘗有人授以金丹之術弗之信旣得陸九淵書喜曰此豈不足以致吾知而力吾行而他求耶或以時科舉方興苑獨違所尙荅曰理則然耳生平剛方正大而練於世故毅然以昌明古道爲己任拳拳不勝其憂天下後世之心而無十金之產一命之貴以困苦終其身學者稱爲靜明先生至順元年卒年七十五其時趙偕字子永宋忠惠公與憲後慈谿人亦厭棄舉業致力於楊簡書遂隱於大寶山之麓鄉人烏本良輩皆從之游或勸之仕曰吾故宋宗室子也非不欲仕但不可仕且亦非行道之時也時人高之稱爲寶峯先生然達於治體慈谿尹陳麟

慕偕躬執弟子禮偕告以治民事宜以會集賢士於學宮從容講明政事得失人物賢否爲要又言司吏必當訪求忠直之士麟以是聲譽大起語在循吏傳中苑弟子玉山祝蕃蕃遠安仁李存仲公舒衍元易吳謙尊光號西江四先生存一試不第卽決計長隱三以高蹈邱園薦不應秘書李孝光舉以自代當事者將以翰苑處之不果葺書室曰竹莊題曰俟菴人又稱爲番陽先生四方兵起門人何瑗迎養於臨川至正十四年卒蕃教授饒州終潯州總管府經歷時又有長洲袁易鄞袁士元秀水戚敬袁易字通甫風姿秀朗不求仕進部使者將薦之於朝謝不可行省署長石洞書院罷歸所居吳淞具區之間築臺曰靜春聚書萬卷手自校定堂之外蒲荷松菊之屬繚繞焉禽魚時翔泳其下或風止雨收挾小舟以筆床茶竈古玩器自隨扣舷高歌望而知爲世外人也嘗與

郡人龔璠子敬郭麟孫翔卿游人目爲吳中三君子趙孟頫嘗作臥雪圖以貽之璠以江浙副提舉致仕士元字彥章性至孝父患背疽吮之立愈年幾四十未嘗入仕御史以茂才薦授教授調長鄧山書院累擢國史院檢閱官不赴築城西別墅種菊數百本自號菊村學者常自放於山巔水涘與山僧逸人相唱和焉敬字秉肅號礪齋少有氣節不伍鄉里其兄仕浙東因學於程端禮得其爲學程法家白紵溪上僻遠城市水竹幽茂甚樂之日攝敝衣冠灌蔬緡魚而戒其妻女炊脫粟芼野菜以爲供或勸之仕曰爾非知我者事母尤至孝嘗割股以療母疾母卒敬絕而復蘇構廬墓側白芝生其中人以爲孝感也

薩都刺字天錫別號直齋本荅失蠻氏祖父以勳留鎮雲代遂爲雁門人泰定時成進士方弱冠應奉翰林文字出爲燕南經歷擢

爲南臺御史以彈劾權貴左遷鎮江錄事始至爲闔閩制權衡必得其平歲大稔白太守發廩粟全活甚眾俗尙巫以禍福惑愚民薩都刺捕治之風爲之革歷閩海廉訪司知事河北廉訪司經歷薩都刺善爲詩綺而不縵爲人風流俊逸旣仕途不進遂寓居杭州每風日清美輒肩一杖挂瓢笠腳踏雙不借走東西兩峰閒凡深巖邃壑人迹所不到者無不窮其幽勝至得意處輒席草坐徘徊終日不能去又嘗寓居孝感後登太湖司空山太白臺歎曰此老真山水精也遂結廬其下終焉

杜本字伯原臨江清江人也博學善屬文江浙丞相忽刺朮得其所上救荒策大奇之及入爲御史大夫力薦之武宗召至京師未幾歸臥武夷山中結思學堂懷友軒爲終隱計文宗在江南時聞其名及卽位以幣徵之不起而以所釋周書無逸篇附進文宗納

焉至正三年丞相脫脫以隱士薦天子遣使賜以金織文幣上尊酒召爲翰林待制兼國史編修官本勉行至杭州稱疾固辭而致書丞相曰以萬事爲一理以萬民爲一心以千載爲一日以四海爲一家則可言制禮作樂而躋五帝三王之盛矣遂不行本平昔詩文多不存藁或問之曰觀藝文志所載古人文集今幾何哉故知不必存也然其詩曰清江碧嶂集學者稱曰清碧先生至正十年卒張樞字子長婺州金華人以作續後漢書改正陳壽三國志得名朝廷取其書置宣文閣至正初召爲翰林修撰亦至杭州固辭歸

孫轍字履常撫州臨川人也幼孤母蔡氏教之樹立轍事母甚孝家居教授門庭蕭然而佳士恆在其門待鄉曲禮意周洽未嘗幾微言人過失部使者長吏以下造訪皆接之以禮言不及官憲司

元書 卷九十一
屢辟皆不就江西行省特以遺逸舉轍一人同郡吳定翁仲谷清
修文雅與轍齊名爲人修整寒暑衣冠不少懈省臺辟薦相望終
身不爲動程鉅夫嘗貽書曰臨川士友及門者踵相接也何相望
之下耿耿如玉人而終不得見乎定翁嘗言士無求用於世但求
無愧於世人以爲名言又有李康字凝之桐廬人事母篤孝人稱
李孝子工詩旁及書畫琴奕至正二年郡守馬九皋幣聘不起九
年奉使高其行又起之復辭及行省宰臣至邑遣邑令造請議事
康不得已乃往極談當世得失欲官之以母老辭歸

楊維禎字廉夫紹興諸暨人也少學於倪淵泰定四年成進士署
天台尹改錢清場鹽司令狷直忤物十年不調久之遷建德路總
管府推官擢江西儒學提舉未上會兵亂避地富春山徙錢塘張
士誠據浙西聞其名欲見之禎與之書曰閣下乘亂起兵首倡大

順以獎王室淮吳之人萬口一辭以閣下之所爲今日不可及者
四兵不嗜殺一也聞善言則拜二也儉於自奉三也厚給吏祿而
姦貪必誅四也此東南豪傑之所望以有爲者也然賢人失職四
民失業亦不少矣吾惟閣下有可畏者動民力以搖邦本用吏術
以括田租銓選任官不承制出納國廩不輸將受降人不疑任私
臣而復貳也六者之中有其一二可以喪邦况閣下之將帥有生
之心無死之志矣閣下之守令有奉上之道無恤下之政矣閣下
之親族姻黨無祿養之法有行位之權矣閣下信佞爲忠則斬尙
用信詐爲直則趙高用信貪虐爲廉良則蹠躄者進隨夷者退又
况拜寇而乞生望敵而先退閣下皆敬其人禮之養之則死節之
人少賣國之人來矣是非一謬黑白俱紊閣下今有可爲之時有
可乘之勢而訖無有成之效其故何也爲閣下計者少而爲身謀

元書 卷九十一
者多也閣下身犯六畏釁隙多端不有內變必有外禍不待智者而後知也閣下狃於小安而無長慮東南豪傑又何望乎僕既老且病爵祿不干於閣下惟以東南屬望幸采行之毋蹈羣小誤人之域則小可以爲錢鏐大可以爲齊小白晉重耳也否則麋鹿復上姑蘇臺始憶維楨之言嗚呼晚矣遂謝不往見眾惡其言切直目爲狂生維楨遂徙松江築蓬臺晚年臥起臺上而榜其門曰客至不下樓恕老懶見客不荅禮恕老病問事不對恕老默發言無所避恕老迂飲酒不輟樂恕老狂其誕情傲世如此然家故豪富又通賈利以供揮霍早歲屏居吳山鐵冶嶺起萬卷樓轆轤傳食讀書其上遂以鐵崖自號又自稱鐵笛道人在松江海內羣英造門無虛日日常縱酒酣歌亦嘗攜妓妾乘畫舫恣意所之豪門巨室競相邀致維楨戴華陽巾披鶴氅自倚鳳琶和侍兒白雪辭人

以爲神仙中人也明初召耆儒纂禮樂書使者奉幣來聘維楨謝曰豈有老婦將就木而再理嫁者耶已而有司敦促維楨賦老客婦謠以蹈海自誓乃得去而復還病已革撰歸全堂記頃刻立就擲筆而卒年七十五華亭陸居仁宅之錢唐錢惟善思復與維楨同葬干山人目爲三高士墓居仁自號雲松野衲惟善官副提舉避張士誠退隱吳江筒川自號曲江居士又自稱心白道人張雨字伯雨一名天羽錢唐人年二十徧游天台括蒼諸山棄家爲道士登茅山授大明經籙開元觀王壽衍偕之入都璽書賜驛傳欲官之自誓不更出往來華陽雲石間作黃篋樓儲古圖史甚富世稱句曲外史至正間卒於開元宮齋舍雨風裁凝峻趙孟頫一見異之授以李北海書法范梈以詩與雨交由是名震京師袁易馬祖常楊載揭傒斯黃潛諸人皆爭與爲友雨師事虞集又爲楊維

元書 卷九十一 九
楨所推重張昱字光弼廬陵人少事虞集又爲張翥所知左丞楊完者辟參謀江浙軍府事遷左右司員外郎行樞密院判官完者死棄官不出張士誠禮致之不屈策其必敗題蕉葉以寓志與楊維禎周伯琦交最厚元季用兵藩府僚屬多侵官怙勢惟昱以詩酒自娛超然物表退居西湖壽安坊貧無以葺廬凌雲翰爲疏募馬酒閒爲瞿宗吉誦歌風臺詩以界尺擊案淵淵作金石聲笑曰我死埋骨湖上題曰詩人張員外墓足矣明初被徵放還卒年八十三嘗自號一笑居士維禎邑人陳大倫字彥理從吳萊學絕意仕進元季避兵流子里作晚香亭日與賓客暢飲高歌舉座絕倒嘗語人曰吾平生無他嗜惟攻文成癖孳孳屹屹垂四十年昔之人如此何限今安在哉每搔首自傷聞者亦莫不傷之華亭周之翰申甫兵興隱居神山頎然長身松形鶴骨終日談論經史典故

媿媿不倦徧涉老莊竺乾等書年七十六卒維禎嘗曰吾在九峯三泖閒有李五峯張句曲周易癡錢曲江爲唱和友之翰博極羣書尤精易學自號易癡道人故維禎稱焉又有永嘉孫華元寶寓於華亭以博雅聞亦深於靈素用薦爲醫學教授命待詔尙方辭免江浙請署使庸田亦不就好修潔戴折角巾衣鶴氅登山臨水步趨脩然所居小閣列古彝鼎法書名畫焚香靜坐終日書非佳墨熟紙不作飲饌不精潔不食士非賢不與交年八十餘維禎深重之

顧瑛一名阿瑛別名德輝字仲瑛平江崑山人也世居界溪輕財結客年三十始折節讀書購古書名畫三代以來彝鼎秘玩集錄賞鑒無虛日舉茂才署會稽教諭辟行省屬官皆不就年四十以家產付其子元臣築別業於茜涇西曰玉山草堂自號玉山主人

園池亭榭餼館聲伎之盛甲於天下四方名士若河東張翥會稽楊維禎天台柯九思無錫倪瓚永嘉李孝光方外若張雨于立等皆主其家日夜置酒賦詩呼伎侑觴一時風流文雅著稱東南張士誠據吳避居嘉興合溪母喪歸士誠再辟之遂斷髮廬墓自號金粟道人至正末元臣爲水軍副都萬戶受封將軍錢唐縣男明初以元臣爲元官例徙臨濠俄而卒年六十自爲壙志戒其子以紵衣桐帽襪鞵布襪纏裹入土說者以爲趙岐之遺令也同郡唐元本初嗜古博雅有船號一葦杭浮游江湖日哦詩其中每過瑛溪上必繫舟談笑終日而去又瑛同邑陸仁良貴郭翼義仲呂誠敬夫馬譽公振皆好尙文雅與瑛及楊維禎相交接時以爲崑山多才子也又永嘉張天英義上官國子助教雅不好趨謁再調不就游浙西多居吳下與瑛善自號石渠居士湖州郟韶九成至正

中嘗辟試漕府椽不事奔競澹然以詩酒自樂自號雲臺散吏又號茗溪隱者嘗往來玉山與瑛及諸客唱和素不善畫偶渲筆爲山水圖輒爛漫奇詭坐上皆稱歎之是時辭僭竊幣聘者復有張介福戴道顯蔣大德周必達高明趙善瑛介福字子祺自懷慶徙吳中少受業於許衡親歿遂絕意進取家貧冬不能具夾襦或遺以紵絮不受纖介必以禮張士誠入吳有卒犯其家危坐不爲起刀斫面仆地醒復取冠戴之坐自若卒驚怪以爲異物走去介福恐發其先墓往廬焉士誠聞而欲致之不可使其弟問之曰無樂亂無貪天禍無忘國家饋之力辭已疾革謂其友曰吾志希古人未能也惟無污於時庶幾哉遂卒道顯字均用與大德必達皆台州人方國珍據有浙東欲聘用之道顯亡匿山中大德善遇使者而以死辭旣而私謂其友曰平時我尙不欲仕况此輩欲污我乎

歲旱以粟周其鄉人使勿散弟子告用將不給大德曰吾豈獨生而坐視人皆死耶必達初隱天台山中方國珍問計必達曰今四方雖亂君舉義爲天子除盜斯名正言順富貴可致餘非吾所知也後國珍敗始悔不從其言明字則誠永嘉平陽人至正五年進士授處州錄事辟丞相掾方國珍叛行省以明溫人知海濱事擇以自從論事不合國珍就撫卽日棄官旅寓鄞櫟社沈氏樓明主召之亦不至也後歸以疾卒於家善瑛字廷璋成都人八歲能詩明詩禮春秋隱居教授明玉珍時居樂績山中遣使徵聘不就入明築室錦江詩云守道居顏巷嫌喧棄許瓢蓋以巢由自况也優游二十餘年乃卒年七十有八

倪瓚字元鎮常州無錫人也其先世以貲雄一郡瓚不事產業強學好修刻意文史所居有雲林堂蕭閒館清秘閣諸勝其閣如方塔三層疏窗四眺遠浦層巒雲霞變幻彈指萬狀窗外巉巖怪石皆太湖靈壁之奇高於樓堞松篁蘭菊龍葱交翠風枝搖曳涼陰滿苔閣中藏書數千卷手自勘定三代鼎彝名琴古玉分列左右時與二三好友嘯詠其閒性好潔見俗士避之如恐浼盥頰易水振拂巾服日以數十計居前後樹石頗令洗拭書畫蕭疏秀挺稱其爲人後至元中天下無事一日盡斥賣其田產得錢以與貧交疏族及兵興富家多被剽掠瓚扁舟箬笠往來湖泖閒人乃服其先識也張士誠聞其名屢欲招致之不屈明洪武七年始還鄉里年七十四矣客其姻鄒惟高家竟卒於鄒氏嘗自謂懶瓚亦曰倪迂性雖高曠然篤於風義其師王仁輔老而無子瓚迎養於家歿爲制服執喪營厚葬云瓚與黃公望吳鎮王蒙名畫苑四家公望字子久本姓陸世居常熟繼永嘉黃氏遂徙富春後至元中浙西

廉訪徐炎辟爲吏一日著道士服持文書白事炎怪而詰之卽引去更名堅自號大癡道人或稱一峰道人居於西湖之笕箕泉已而歸富春卒年八十六公望天姿敏異早應神童科博極羣籍通音律圖緯之學畫師董巨源而晚變其法其峯巒多巖石筆墨高雅人莫能及嘗終日在荒山亂石叢木深篠中意態忽忽或往泖中通海處看激流轟浪雖風雨驟至水怪悲咤不顧楊維禎謂公望詩宗晚唐畫獨追關仝其據梧隱几若忘身世蓋游方之外非世俗所能知也鎮字仲珪嘉興人亦工書能詩時人號爲三絕傳先天易嘗垂簾賣卜隱於武塘所居曰梅花菴自號梅花道人至正十四年卒年七十蒙趙孟頫甥事在孟頫傳孟頫又有甥崔彥輝錢唐人以畫名兼善篆隸詞賦隱居賣菜鹽橋市以終

王冕字元章紹興諸暨人也本田家子八歲父命牧牛隴上潛入

塾聽邨童讀書暮亡其牛父怒撻之他日依僧寺坐佛膝上映其燈讀書安陽韓性異而教之遂通春秋嘗一試進士舉不第卽焚所爲文讀古文兵法著高簷帽衣綠蓑衣躡長齒屐擊木劍或騎牛行市中人疾其狂同里王良雅重之爲拜其母良爲江浙檢校冕曳敝履往謁良遺之草履諷使就吏祿冕置其履而去迎其母至會稽駕以白牛車冕被古冠服隨車後所居倚土壁度釜執爨養母居歲餘北游燕都泰不花薦以館職冕曰君愚人不滿十年此中狐兔游矣何以祿爲冕工畫梅以燕支作沒骨體燕中貴人爭求之乃以一幅張壁閒題詩其上曰疏花箇箇團冰玉羌笛吹他不下來或以爲刺時欲執之冕覺之亟歸隱會稽九里山種豆三畝粟倍之薤韭各百本芋一區梅花千樹構茅屋其中自號煮石山農命其居曰竹齋題其舟曰浮萍軒自放鑑湖之曲賦詩輒

千言鵬寰海怒讀者爲聳明兵取婺州進攻紹興至九里山其將胡大海知冕在延問策冕曰越人秉義不可以犯若爲義誰敢不服若爲非義誰則非敵明日疾遂不起或曰明欲官以諮議參軍冕不受因發憤死也

戴良字叔能浦江人嘗學文於黃潛柳貫學詩於余闕起爲月泉書院山長久之以薦授淮南江北儒學提舉然時事已不靖無可行其志乃攜家浮海渡黑水洋憇登萊求閒道歸道梗不得達僑寓昌樂數載訪求齊魯豪傑奮欲有爲而卒無所遇遂南還慶元慶元多名山水耆儒故老往往流寓於此因相與燕集爲樂酒酣賦詩擊節高詠聞者悲而壯之明洪武十五年召試以文命居會同館日給大官膳欲官之以老病固辭明年遂自藥死良世居金華九靈山下自號九靈山人嘗自贊曰處榮辱而不一齊出處於

一致歌黍離麥秀之詩詠剩水殘山之句則於二子庶幾無媿王逢字原吉江陰人弱冠有文名至正中嘗作河清頌臺省交薦之皆以疾辭世居江上之黃山自號席帽山人避地無錫梁鴻山未幾遷松江青龍江名所寓曰梧溪精舍自號梧溪子又徙上海之烏涇築草堂以居曰最閒園自號最閒園丁嘗說張士誠歸國以絕明士誠亡明欲辟用之不起復以文學徵其子通事掖以父老泣請免年七十卒論者以爲元亡後惟戴良王逢惓惓故國每見於詩歌也時又有金華葉杞字南有始辟建德掾辭兵興侍御史李國鳳經略南土杞密陳時事十條國鳳納所言遙授義興副尉丹徒主簿將別任之而柄移藩鎮杞有別業在淞之吳滙築草堂魚鱗涇上署曰漪南王逢爲之題曰仁義是漁兮澹口腹腹不人累兮人誰吾辱又周霆震字亨遠安成人以先世居石門田西

故又號石田子初嘗深謝世事閉門受經專意古文辭遭至正之亂東南奔走作爲詩歌多哀怨之音年八十八入明十餘年乃卒門人私謚曰清節先生又梁寅字孟敬新喻人用薦爲集慶訓導遷臨江教授明召修禮書不受官還隱居蒙山於六藝咸有著述當時目爲梁五經至建文二年始卒年八十二

李祁字一初別號希蘧茶陵州人也元統元年進士除應奉翰林文字累遷江浙儒學副提舉以世亂隱永新山中祁每與諸將言必陳君臣大義聞諸城不守輒憤切食不下咽及談國家輒流涕不自勝元亡自稱不二心老人明初以耆儒召祁力拒不起年七十餘卒同時王禮字子尙更字子讓廬陵人官廣東元帥府照磨元亡不仕明聘爲考官亦不就嘗選輯同時人詩爲天地閒氣集做謝翱也楊允孚字和吉郭珏字彥章皆吉水人允孚至正時爲

尙食供奉官後棄去襍被歲走萬里窮西北之勝凡山川地產典章風俗無不記以詩歌元亡作灤京雜詠時兵燹所過莽爲邱墟四視曩游慨然興歎實故宮禾黍之思也珏以時亂遂隱明初徵茂才不就抗迹行吟與允孚齊名魯貞字起元自號桐山老農開化人詩集題至正年號入明惟題甲子吳皋字舜舉臨川人從吳澄游官臨江教授元亡遜跡以終又曠許汝霖時用純安徐九齡大年皆第進士終不仕明

舒頤字道原徽州績溪人也年十五卽能力學長益有聲馬祖常輩大器之後至元時江東憲使燕只不花辟爲貴池教諭轉台州學正時艱不仕奉親攜書歸遁山中嘗與親避賊巖谷被執正色叱賊賊義而釋之明初州郡交聘高臥北山之陽以疾辭不出元亡十年乃卒年七十四頤辭聘後誅茅結廬爲讀書所扁曰貞素

齋自作貞素先生傳其略曰華陽山下有一老翁年踰七十皓髮
炯瞳齋前植花數本四時紅白相繼環以湘竹良辰美景親朋聚
談有酒酌數行蔬肴惟所有陶陶然不計家之有無也風清晝朗
或篆隸數章意與筆悟則怡然自得雖不逮斯繇然時人亦莫予
解也其澹逸如此時有桐廬徐舫方舟岳州胡乘龍天游江陰俞
遠之近諸暨楊恆本初武進謝應芳子蘭義烏金涓道原餘姚王
士毅子英岑安卿靜能皆高士也舫幼輕俠好擊劍走馬蹴鞠既
而悔之習科舉業復棄去學爲歌詩有聲參政蘇天爵將薦之舫
避去築室江皋日苦吟於雲煙出沒閒自號滄江散人宋濂劉基
葉琛章溢赴明之召舫黃冠鹿裘立桐江上基等欲冠服之載上
黟川不可乃止至正二十六年卒於家天游以字行名藉一世然
負高氣不肯一起取斗祿晚益自矜徘徊亂世以緬想太平之心

更作述志賦以寓長飲之恨云遠隱居教授自號空谷子身癯神
骨秀竦好著小冠戴方山椶笠衣白綺裘儼然神仙中人每出一
市盡驚至正兵亂築土室嘯歌其中長吟短咏王逢極稱重之恆
爲文峻潔隱居白鹿山亦好戴椶帽而披羊裘帶經耕煙雨閒嘯
歌自樂自號白鹿生入明不受辟召應芳爲人耿介尙氣節至正
初江浙行省舉三衢清獻書院山長阻兵居吳之葑門轉徙吳淞
江上築室其旁教授之暇以詩酒自娛明初年逾八十歸隱橫山
自號龜巢老人涓嘗受經於許謙學文於黃潛淹貫經傳卓識過
人虞集柳貫交薦之不起明初州郡薦辟輒辭隱居教授青村夷
猶雲石山水閒以終學者稱青村先生士毅初試蘆化場典史不
樂卽棄去向南山臥後聞黃叔英講道慈溪遂從之有欲強起爲
祿仕者輒堅辭隱居所曰上林環堵蕭然妻子清坐相看亦未嘗

有憂色家以匱乏聞則曰吾道固爾也晚慕陶潛自號東臯處士年七十二卒安卿居栲栳山下號栲栳山人士毅與之友嘗握手歔歔行游湖山間飲酒賦詩竟日夕不厭安卿志行高潔亦窮阨以終又有朱希晦樂清人元季有詩名與吳志純主一趙彥銘稱雁山三老明初徵召不受職還志純無爲州人歷官縣簿以兵亂徙豫章又徙鄞除翰林待制爲權倖所阻入明遂不仕

丁鶴年以字行其先回回人父職馬祿丁以世蔭爲武昌縣達魯花赤遂徙居焉鶴年以父丁爲氏色日向畧喪制鶴年父卒年才十二卽從古禮服斬衰三年年十七而通詩書禮三經至正閒淮寇渡江襲武昌鶴年奉母行備極艱阻母歿鹽酪不入口者五年聞從兄吉雅謨丁爲定海令乃徒步往依之遂留慶元省臺交薦凡九上皆不就吉雅謨丁以利祿勉之去不顧後吉雅謨丁以忤

權要南謫道遠僕隸憚行鶴年乃冒雪千里從之後復還越寄食海鄉爲童子師旣而方國珍據浙東大忌色目人鶴年深匿海島賣藥自給是時通政院判伍實督運海上負才氣不禮賓客獨賢鶴年然雖迎致之覩其衣敝欲易之而不敢言也慈溪尹陳麟有賢聲士大夫多依之鶴年居其邑數載未嘗覩其面鶴年好學多聞精詩律自以家世仕元不忘故國順帝北行後飲泣賦詩悽惻動人晚學浮屠法廬父墓自國變後三十餘年乃卒貢性之字友初宣城人貢師泰從子師泰有傳性之初以胄子除簿尉明初錄師泰後大臣以性之薦性之避居山陰更名悅邑人芮麟遇而邀歸性之辭云游絲落絮俱成恨社燕秋鴻各自飛時其兄弟已同仕明迎歸金陵宣城俱不往躬耕自給以終其身門人私諡曰貞晦先生時又有閩人吳海字朝宗至正中以學行稱值四方盜起

絕意仕進明初守臣欲薦之力辭免既而徵入史局復辭與王翰
善海以翰累世仕元勸之死海教養其子備成立人多稱焉翰在
忠節傳

論曰吳訥曰元世祖克江南畸人逸士浮沈里閭間多以文酒玩
世嗚呼此乃元之所以多高隱者也易曰井冽寒泉食以中正也
當是時中正非冽不可然過冽則物將不堪文酒者天地之仁氣
也天地仁而後萬物生雖極偏宕不庸愈於豐蔀者乎夫過冽猶
不可况泥乎故五代史記求一行之士寥寥焉何哉君子必有以
知之矣

楊書田 刊
 劉世昌 刊
 門人曾廣休襄校
 門人曾士琮詳校

元書卷九十一下

元書卷九十二

邵陽曾廉撰

忠節列傳第六十七上

昔孔子對魯哀公曰君使臣以禮臣事君以忠嗚呼人臣之事君忠盡之矣忠可以達可以窮可以親可以疏可以生可以死也故易曰上天下澤履君子以辯上下定民志孔子曰事君盡禮人以爲諂也麻冕禮也今也純儉吾從眾拜下禮也今拜乎上泰也雖違眾吾從下夫聖人豈好諂而違眾哉上下之分辯然後民志以定而國家可治也此其爲事微而其機甚鉅也其後楊朱作則曰忠不足以安君適足以危身義不足以利物適足以害物嗚呼此乃孟子所謂無君者也所謂充塞仁義者也其後至秦二世復有李斯上書言儉節仁義之人立於朝則荒肆之樂輟矣諫說論理

之臣開於側則流漫之志誦矣烈士死節之行顯於世則淫康之
虞廢矣明君獨斷滅仁義之塗掩馳說之口困烈士之行犖然獨
行恣睢之心而莫之敢逆也嗚呼吾不知斯何以肆意如此斯蓋
祖楊朱之說而益之以阿意者也吾以爲秦之興其百里蹇叔乎
秦之亡其商鞅李斯乎何則商鞅貶孝子爲不父其父李斯絀忠
臣爲不君其君也故二世以殺人眾者爲忠臣李斯之教也卒之
爲趙高所中乃欲以諫諍求生豈不愚哉蓋斯之所爭皆向之以
爲明君不行者也且若其言則將貴昆吾廉來而賤龍逢比干矣
尙頹叔囊瓦而薄富長沈尹矣儉節仁義之人不立則驕汰傾險
之人至諫說論理之臣不開則讒諛沈默之士至烈士死節之行
不顯則尸素苟免之士至是宮府之寮家邊關之將帥守土之司
執法之吏率皆朱芾充位而無一人心乎家國者也故章邯降則

將帥亡南陽守齟降則守土亡趙高貳則宦寺亦亡而鉞交於二
世之胷矣此信李斯之效也且夫人君之治其國也平日無犯顏
敢諫之士斯臨時必無效節死義之臣是故爲之秩位以尊之未
敢必以爲勸也爲之祿糈以養之未敢必以爲富也爲之圭組以
寵之未敢必以爲榮也爲之鍾鼎以樂之未敢必以爲泰也用臣
不必忠忠臣不必用此古今魁傑所由傷心扼腕者也然而孔子
必曰以忠也人臣之事君固無有逾於此也易曰過涉滅頂凶無
咎子曰過涉之凶不可咎也明知其滅頂而不可不涉也斯乃所
以大過人也故曰不可咎也然則烈士者誼主不得而牖之讒臣
不得而困之也祖宗以來累世之恩聖賢千秋相傳不絕之緒死
則明志生則覲顏且傳瑕納鄭厲而厲殺之里克納晉惠而惠殺
之清夜以思展轉百計爲人臣者沁沁覲覲低首下心改頭易面

元書 卷九十二
以圖效於他人亦何益乎此王蠋之所決計於一劍紀信之所甘心於就烹而無俟遲回者也迹其慷慨捐生或妻子駢戮或闔門焚死風雲爲之鬱闕天地爲之變色亦可哀矣然而天性之所有也聖人之所許也楊朱李斯之徒亦何爲哉嗚呼彼蓋惟恐國之不亡人心之不死不足以售其心之所欲而後漫爲邪說以惑人也而其所爲大不忠必自蔑禮逾分始也亦見其姦矣而受其惑者遂至蔓延天下神州陸沈如水益深奈何不俯而自思哉故君子未有不孝而可以事其親人臣未有不忠而可以事其君者也元興代有忠烈紅巾之亂疾風勁草至於國亡且十數年而死者不絕也余錄自李伯溫以下百六十餘人爲忠節傳以終孟子息距之意以回猛獸洪水之害蓋司馬遷所謂言六藝者必折衷於孔子云

李伯溫守賢之從兄也系里具守賢傳初伯溫兄惟則與從弟伯通皆早歸國錦州張致叛伯通大戰城北死焉太師國王木華黎破平陽以惟則爲平陽征行萬戶旣而以從弟惟正代惟則惟正者質木華黎軍中從征伐者也尋擢惟正河東南路都元帥守平陽十五年金將郭文振張開旣陷太原遂合攻汾州將破守正以義赴援知眾寡不敵以計走之明年討金將軒成於陘州中矢會金將完顏合達攻平陽守正以創甚遂戰沒木華黎令其弟守忠代惟正位十七年金青龍堡主將平陽公胡天作被執復令伯溫行平陽元帥府事鎮青龍堡青龍堡者胡天作所立爲平陽府治者也二十二年金紇石烈真襲擊行營招討使攝國王按札兒於洪洞守忠出援會於高梁師潰入城其副夾谷常德獻門納金兵平陽遂陷金人執守忠至汴誘之降守忠語不遜金人覆以鐵籠

元書 卷九十二
炙死方守忠之執也金人亦銳攻青龍堡李成開水門導敵入伯
溫登樓堞謂左右曰吾兄弟仗節擁旄受方面之寄當以死報國
然吾弟已見執我不可以再辱乃拔劍殺家屬投井中卽以刃植
柱刺心而死金人皆嗟歎之

攸興哥渤海人也世農家善騎射以武斷鄉井金末避地大甯國
兵至出保高州富庶寨射獵以食雄勇屢抗大兵木華黎攻破其
寨遂奔高州木華黎則圍高州下令曰能斬攸興哥首以獻則民
皆獲生守者召謂曰汝奇男子吾豈忍斷汝首汝其往降乎不則
吾一城生靈無噍類矣興哥乃折矢出降諸將怒欲殺之木華黎
曰壯士也留之麾下從攻通州一夕造巨礮雲梯各數十附其城
州將懼乞降以功得賜名哈刺拔都從略燕南爲先鋒至大名金
將登城督戰興哥射中其左目其部將開門南奔城遂下授河東

北路兵馬都元帥鎮太原時太原新破至則下令軍中凡俘獲人
口有親者聽贖無貲者官爲贖民得完聚者眾旣引兵援陞州而
金將乘虛擣太原西門俘獲其妻子興哥聞之徑趨西門奪之還
又以計給金大軍潰之太原諸邑時已皆平惟石家昂及孟州陵
井寨忻州清泉寨爲唇齒未下興哥兵將至陵井遣卒叩寨門詐
曰納糧芻守者入之眾驚潰諸寨悉平會姦人夜獻太原東門於
武仙仙兵大至諸將自外呼曰哈刺拔都當早出興哥曰眞定史
天倪平陽李守忠陞州田雄皆失守矣我又棄太原將何面目見
主上乎家屬任所俘我誓與城同存亡遂沒於陳太宗時使其子
忙兀台嗣鎮太原

任志潞州人木華黎略地潞州迎降俾充元帥收輯山寨志戰輒
勝金禽其子如山以招之曰降則爾子得生不則死志曰我爲國

家豈愛一子乎卽親射殪之木華黎召諸將議事志往道經武安其縣已反爲金志死之其子存襲元帥武仙攻潞州存亦戰死詔有司廩其妻孥仍賜第居之後姪成子立相繼爲潞州長官立歷澤州尹遷陳州卒

鞏彥暉易州人也與兄彥榮俱以武勇稱相繼爲總把屬於千戶何伯祥張柔之駐曹武也伯祥別將一軍破大洪諸寨宋人出荆鄂選兵二萬救之彥暉從伯祥連戰大破之復從拔光滌壽諸州已攻泗州諸將夜集城下爲塹水所阻黎明無敢渡者兩軍交射如雨彥暉披重甲徑渡衆隨之至晡得其外城尋登其月城彥暉將下顧伯祥失所在乃與王進反求之敵追襲彥暉力戰翼伯祥以出由是伯祥彥暉如親昆弟以功得賜銀符俾兼鎮撫世祖帥大軍渡江次武昌宋援兵四集有舟數十來挑戰彥暉逐之入湖

中伏出被圍數匝左右莫能近彥暉矢盡身被重傷度不能免遂投水中敵援之出載歸江州見宋官不屈問以事不對竟死後其子孫世襲管軍千戶

趙匣刺以父任爲千戶佩金符中統時守東川敗宋夏貴侵虎嘯山之兵宋劉雄飛犯青居山舊府匣刺又敗之於都壩俄元帥欽察攻釣魚山匣刺略地至南壩又擊宋兵敗之又從攻大良坪匣刺邀擊咎萬壽運糧之軍敗之匣刺亦被三創欽察爲鑿之而出其鏃匣刺神色不動也數年爲東川先鋒使兼管京兆延安二路新軍戍東安虎嘯兩城復進攻釣魚山及重慶疾作還瀘州而瀘州復叛遂與其從者二十人皆死之子世顯船橋副萬戶其時董士元長卿父文炳有傳初從憲宗世祖累戰甚力後襲其叔父文蔚千戶從博魯歡攻揚州夜與宋將姜才爭灣頭堡戰死謚忠愍

元書 卷九十一
伯八兒以舊臣明里也赤哥孫擢萬戶鎮謙州諸王昔里吉脫鐵木兒叛伯八兒以聞且乞往討未得命爲所襲死焉脫鐵木兒取其二子八刺不蘭奚分置左右居歲餘八刺陰結其近侍圖復仇謀泄南奔追執之詰曰我遇汝厚顧反邪八刺曰汝叛君而害我父掠我親屬我誓欲殺汝以報仇今力窮被執從汝所爲不稍屈以鐵搗碎其膝終不跪遂與不蘭奚同受害幼子何都兀赤官至河北河南道肅政廉訪使

合刺普華父岳璘帖木兒有傳合刺普華幼習畏吾兒書並通經史記誦精敏初居益都中統三年李璫反其母奧屯氏攜季子脫烈普華避地登萊閒音問隔絕號泣徹晝夜繼從叔父撒吉思平賊卒奉其母歸撒吉思深器重之言於世祖召入宿衛嘗以事至益都置廣興商山二冶以勞授金符爲商山鐵冶都提舉未及代

以職讓其弟時國兵南伐餽運繁興被選爲行都漕運使江南平上疏言親肺腑禮大臣以存國家之體興學校獎名節以勵天下之士正名分嚴考課以定百官之法通泉幣卻貢獻以厚生民之本又言江南新附宜招舊族力稽通商弛征薄入以撫馴其民不則恐尙煩宵旰之慮帝多采用會其時阿合馬專政以邗溝達河漕糧漂溺虧耗責償舟人合刺普華伏闕抗言糧之踦贏出於原降而水道之虞非人力所及且彼雖罄其家不足以償苟朝廷必欲取之臣請獨當其辜詔勿治然由是忤阿合馬意出爲甯海路達魯花赤改廣東都轉運鹽使招討鹽徒爲亂者而奏罷其幣政已而劇賊歐南喜僭僞號聚眾至十萬合刺普華與宣慰使白佐分兵扼之未幾右丞唆都征交趾屬護餉道北至東莞博羅界遇賊橫絕石灣鋒銳甚合刺普華矢竭馬創徒步格鬪爲所執賊欲

元書 卷九十一 六
奉爲主不屈遂遇害贈守忠全節功臣戶部尙書諡曰忠愍而軍中往往見其乘騅督戰云子僕文爵仕至吉安路達魯花赤贈宣惠安遠功臣禮部尙書雲中郡侯諡曰忠襄子五人曰僕玉列僕自堅僕哲篤僕朝吾僕列篋及弟子善著皆第進士而哲篤列篋最知名哲篤官至江西右丞以論鈔法附丞相脫脫人以此少之列篋字世德入翰林出監潮州有政聲罷歸益都值紅巾亂益王檄守東門列篋知事不可爲因往別道士陳白雲自言必不辱國辱先預以後事爲託竝具牲酒辭祖墓城陷列篋投井死妻妾子女從者十一人明日白雲乃浚井出之具棺以葬哲篤子僕百僚遜善著子正宗阿兒思蘭亦皆成進士百僚遜仕應奉翰林文字其時有闕文興建康人爲漳州招討司知事陳弔眼盜起有眾數萬連營五十餘寨元帥完者都遣文興討之賊乘高據險人莫敢

進文興蕪薪焚其營多斬獲賊走入畚洞已擁眾攻漳州文興竭力捍城身經數十戰死於陣妻王氏名醜醜被掠義不受辱乃給賊曰俟吾葬夫後卽從汝也賊許之得脫負屍還積薪焚之火旣熾氏自投火中死元統二年封文興英毅侯王氏貞烈夫人廟號雙節

劉天孚字裕民大名人也累官知許州所至有治績時檢核屯田臨潁鄧艾口民稻田三百頃有欲害之者指爲古屯陳於中書請復築之天孚爲辯其非章數上乃止襄城與葉接壤其南爲湛河襄城食滄鹽葉食解鹽刻石河南岸爲界葉令妄徙石於北二里誣其民食私鹽繫治百餘家兩縣鬪辯天孚爲攷正經界申中書葉令乃伏罪又有甘雨及羣鳥啄蝗花蟲食蝨之異許人立碑頌焉延佑中知河中府視事甫兩月會周王出鎮雲南道經陝西行

省丞相阿思罕謀擁戴以爲功卽舉兵向河中時事起不虞天孚
日夜治戰具選丁壯分守要害然度不能拒乃遣使至晉甯乞援
凡八遣使皆不報而阿思罕已濟河入其城欲脅天孚使附己方
坐府治號令諸軍天孚佩刀直前眾遏之不得進乃退謝僚屬拂
衣出時天寒河冰方堅天孚拔所佩刀斫冰開北望再拜投水死
阿思罕大怒籍其家郡人咸哀痛之事平召其弟天惠給驛歸葬
贈推誠秉節功臣中奉大夫河東山西道宣慰使護軍彭城郡侯
諡曰忠毅

蕭景茂漳州龍溪人也性孝友儒而有文家貧力農以謹厚信於
鄉里後至元四年南勝縣民李志甫作亂掠龍溪景茂與兄佑集
鄉丁拒之據觀音山橋險戰敗被執賊使拜曰汝賊也何拜欲脅
之降曰國家何負汝而反汝族汝里何負汝而坐累之我生爲大

元民死爲隔洲鬼豈從汝爲逆耶隔洲其所居里也賊怒縛之樹
斮其肉使自啖景茂益憤罵賊以刀決其口至耳傍景茂尙罵不
絕聲而死有司上其事朝廷給賻復其家

張桓字彥威真定藁城人也父本知汝甯府因家焉桓以國子生
釋褐授滑白馬丞累拜西臺御史以言事不合去未幾汝甯盜起
桓避之確山賊久知桓名襲獲之羅拜請爲帥弗聽囚六日擁至
其渠前桓據榻坐與之抗論其徒粹桓起跪桓仰天大呼詈叱彌
厲且屢唾賊面賊猶不忍殺謂曰汝但揖亦恕汝死桓瞋目曰吾
恨不能斬汝首肯聽汝誘脅而折腰哉賊知終不可屈遂刺之後
語人張御史真鐵漢害之可惜事聞贈禮部尙書諡曰忠潔

李羅帖木兒字國賓畏吾兒人也以宿衛累官至襄陽路達魯花
赤至正十一年盜起汝潁鄖陽田端子等亦聚眾殺官吏李羅帖

木兒將民兵捕斬之未幾省憲同檄以其所領兵會諸軍於均房同討賊賊甫退而穀城光化以急告卽分兵趣之而襄陽餉運不至促之不應軍乏食不能行乃駐於柴店明年襄陽陷總管柴肅死字羅帖木兒領義兵二百前赴監利會諸軍及糾合丁壯水工五千餘人水陸繼進至石首則聞中興亦陷乃議赴岳州而道阻不得前仍趨襄陽敗賊楊湖港進次潛江與賊戰皆有斬獲是日甫止兵未食而賊大至抵暮被重創磨兄子馬哈失力使去曰吾以死報國汝勿留此馬哈失力泣曰死生從叔父旣而字羅帖木兒被執罵賊遇害馬哈失力帥家奴求其尸復與賊戰俱沒於陣舉家死者二十六人卜理身敦亦畏吾兒人官山南道廉訪使以威惠聞斬賊犯中興引挽強士禦之射賊多死賊稍卻明日復至力戰被執不屈死前中興判官上都亦以力屈爲賊所得誘使降

上都大罵賊遂刳其腹而封其肉

喜同周姓河西人也初備宿衛眾稱其才選充承徽寺經歷調南陽縣達魯花赤居二歲賊陷鄧州俄向南陽南陽無城無兵喜同以計獲數賊詰之云賊將大至悉斬之以安眾心而晝夜督丁壯嚴守備會大司農錢木爾以兵駐諸葛菴爲賊襲死賊遂傅城喜同登西門望賊勢盛卽與家人訣曰吾不能復顧爾矣乃策厲義兵奮力搏戰賊退明日復至復大殺賊賊知無後援戰愈急南陽遂陷喜同突圍將自拔賊橫刺其馬馬蹶喜同鞭馬躍而起手斬刺馬者而身已被數創不能鬪遂見執爲所殺妻邢氏帥家僮出走遇賊奪其刀斫之亦被害一家死者二十餘人贈南陽路判官時襄陽錄事司達魯花赤塔不台字彥暉元統元年進士魏王軍汝毫塔不台來供餉王嗜酒輕戰備一夕爲賊劫王臥未能起爲

所執塔不台馳騎奪王亦爲賊獲比明見其酋欲王拜塔不台以足蹴王曰猶欲生乎賊復屈其拜塔不台拒而詬之且與縛者角遂被支解

字朮魯遠字明道江浙參知政事朮子也朮有傳遠以蔭調祕書郎出爲襄陽縣尹須次居南陽賊起遠以忠義自奮傾財募丁壯得千餘人與賊拒戰俄而賊大至遠被害妻雷氏爲賊所執賊欲妻之乃詆賊曰我乃參政冢婦縣令嫡妻夫死不貳豈從汝狗彘以生乎賊醜其言雷益號哭大罵乃見殺舉家皆遇害

丑閻字時中蒙古氏元統元年成進士累官京畿漕運副使出知安陸府斬賊魯法興犯安陸丑閻募兵數百以拒賊戰卻追之而賊自他門入亟還城中已火起軍民潰丑閻乃服朝服坐堂皇賊排之下使拜不屈且怒罵賊猶不忍殺之明日又逼其從亂丑閻

疾呼曰吾守土臣豈從汝賊賊怒斷其左脇而死復以布囊盛屍置其家妻侯氏出大哭而列酒肉滿前以飲食賊賊不之疑至夜自經詔贈丑閻河南參知政事侯氏甯夏郡夫人表其門曰雙節同時俞述祖字紹芳象山人以國史院編脩出爲沔陽府推官斬賊丁普郎陷武昌進攻沔述祖領民兵守綠水洪相持十餘日力不支被執械至蘄水誘之降子方五歲亦縛在其側賊指之曰不降將殺是述祖厲聲曰我躬不閱遑恤我後子遂見殺述祖謾罵不已賊支解之贈象山縣男錄其從子爲後方武昌之陷也諸隸悉起剽殺爲盜有馮三者公使也眾拉三使從己三辭曰賊名惡豈可爲之強之不可賊細剖其肉而斷其喉委去其妻拾其剖肉納布裙中並收三血骸脫衣裹之大泣投江死

周鏜字以聲瀏陽州人也通春秋泰定四年成進士官大冶縣尹

縣號難治鏜貌若尪懦而毅然不可犯抑強扶弱治行稱最累擢翰林國史院編脩官出提舉四川儒學便道還家會盜起湖南北郡縣皆陷瀏陽無城守盜至民皆驚竄鏜告其兄弟使遠引自謂我受國恩脫不幸必死毋相累也既而賊果得鏜欲推爲主鏜瞠目厲聲大罵遂遇害鏜同州謝一魯至道後至元初鄉貢進士嘗爲石林書院山長賊至潭州一魯奉親匿巖谷中賊退乃還俄而復至生縛一魯一魯罵賊甚厲舉家皆死難

買住蒙古人官韶州路同知至正十三年郴寇攻韶州買住躍馬身先大破之恢復樂昌諸縣買住進兵不已時已有疾衆勸之還厲聲曰大丈夫當以死報國今羣盜未滅安能高枕牖下死兒女子手耶竟戰死時經歷張鳳儀方從買住以孤軍深入爲賊所攻殺其子萬里痛父仇復率兵力戰破賊獲賊首剖其腹劈肝祭父

而生啗之尋補父官亦死於寇又鄧可賢乳源人慷慨好學郴寇攻乳源可賢率民置砦以忠孝大義相勉且曰砦不能守當急趨韶韶吾父母邦也乃遣子一源閒道上方略買住率兵破寇由是賊深恨之復合兵攻砦久之糧盡水竭可賢子弟七人皆死砦中四百人無一降者郡人建祠祀之

趙觀光鄞人以郡博士得推擇試吏奉化州尋遷昌國方國珍寇起昌國孤懸海中勢甚棘州守問計對曰州兵寡弱且不諳水戰惟蘭秀二山居民悍勇善鬪素習海事若募以重賞示以重賞用之無難也守然其言卽以事委之引兵出海俄而賊船猝至衆皆懦縮莫敢前獨觀光部兵與之奮戰至晚短兵接矢石交下官軍與賊不辨遂死之時有潘伯修字省中黃巖人嘗三舉於鄉不第隱居教授爲詩文皆寓作意曰文章不關世教雖工無益也方國

元書 卷九十二 七
珍寇海上江浙參政朵兒只班總兵至將盡屠邊海之民伯修挺身率父老詣軍前力爭曰倡亂者國珍耳於民何罪乃得免國珍聞之怒遣人沈之於海

王銓字伯衡安仁人登進士歷温州總管及路陷銓公服坐堂上寇至問何不去銓曰方州大臣與城存亡去將何之且吾負國託付死有餘辜但不可延累吾民吾當爲厲鬼以報寇不忍殺銓以言激怒引頸受刃死其女聞之亦抱子赴水以殉其時周誠德温州平陽人寇至浙東元帥府檄爲平陽州同知遂募義勇結民兵剿捕其黨境內以安第功遷樞密判官而方國珍從子明善已據温州屢侵平陽誠德敗之於香山及徐洋累官浙東副都元帥明善深忌之乃賂遺麾下狙伺而誘殺之誠德大罵不屈明善叱左右剝其皮誠德曰齏粉良佳况剝皮乎既死猶屹立不仆有義士

劉公寬團結鄉兵代復仇明善從間道脫去

潮海札刺台氏官請安縣達魯花赤斬黃賊起與縣尹黃紹同起義兵爲守禦計未幾賊兵數萬由武甯來攻紹赴行省求援道梗不得達潮海獨率眾與賊戰於象湖大破之乃起進士胡斗元其謀畫而以勇士黃雲爲先鋒拒守八閱月戰屢勝無何賊鋒益熾雲戰死潮海被圍尋爲賊所執殺於富州子明安圖襲父職屢帥眾敗賊復靖安踰年賊復大至迎戰力竭賊執而丹之紹字仲先臨川人至正八年進士以求援出遇官軍護之始入龍興時龍興亦被圍及圍解乃還與明安圖招諭叛境遇賊高平紹正衣冠怒罵遂爲所害斗元字元灝靖安人領鄉薦第一署鼇山書院山長賊至以鄉兵擊敗之入縣治與潮海共圖戰守及被執賊脅使降弗屈乃以土埋其腰不死縛置暗室中斗元仆牆以出逃入深山

元書 卷九十二 三
狂病而卒雲撫州人素勇敢每接戰獨以身當敵嘗爲數十人所圍能奮身躍出至是身中數十槍噴血而死

魏中立字伯時濟南人積官至西臺中丞遷守饒州賊既陷湖廣分攻州郡官軍多疲懦不能拒所在無賴子多乘閒竊發不旬日眾輒數萬皆短衣草屨齒木爲把削竹爲槍截緋帛爲巾襦彌野皆赤中立聞警卽率丁壯分塞險要戒守備俄而賊至達魯花赤馬來出戰不能發一矢賊愈偏中立以義兵擊卻之已而復合遂爲所執以紅衣被其身中立叱之須髯盡張賊執歸斬水欲屈其從已中立大罵不已遂被害時餘干湯自願伯恭起兵禦賊饒州既陷遂挾其弟姪走港土結臨川諸義士爲保障家人皆有膂力每戰必克聲大振時號湯將軍復路治俄戰敗被禽不屈死又樂平汪伯正以德爲婺源判官鄱陽胡振祖爲浮梁同知皆慷慨有

志節死於饒州之難賊自饒犯信州總管于大本以土兵備禦賊破東門入執大本至蘄水獻俘倪文俊釋其縛畀偽印一紐大本擲印地上亦見殺大本字德中密州人也時有楊樸字文素河南人也以文學推擇爲吏仕至全椒尹行省參知政事也先總兵於滁惟縱飲不恤軍事至暮城門不鑰寇入縱火猶張燭揮杯急踰城走樸度必死乃盡殺其妻女朝服坐堂上寇欲降之樸指妻女示曰我已戕我屬政欲死官守耳尙何云哉連唾之賊倒懸樸於樹而割其肉至盡猶大罵弗絕江日新歙人蘄黃賊陷徽州日新與其弟倡義舉兵選武勇者將之又推搢紳間忠義信於人者協主其事富商大賈皆樂有依賴爭出粟帛牛酒給軍資相持兼旬賊至益眾兄弟迭出戰力竭皆死同郡程擇時爲武昌學正寇至以府檄起義兵固守城陷死之桂完澤者温州永嘉人也常爲平

江路管軍鎮撫爲讎家所訴免官會賊攻昱嶺關行省遂假前官令從征完澤勇於討賊再戰關下皆勝尋賊大至關不利及其妻弟金德俱被執賊皆反縛於樹脅之降德意未決完澤大呼曰金勇男子卽死不可聽賊德諾之因大罵賊怒剖二人腹死

樊執敬字時中濟甯鄆城人也性警敏好學以國子生擢授金郎嘗見帝師不拜或詰之曰吾孔氏之徒知尊孔氏而已何拜異教爲累官侍御史歷山南湖北廉訪使拜參知江浙政事督海運於平江十日將發官大宴犒於海口俄有客船自外至驗其券信令入而不虞其爲寇也旣入港卽縱火鼓譟時變起倉猝軍民擾亂賊竟焚舟劫糧去執敬旣走入昆山自咎其失防心鬱鬱不解及還省而昱嶺關有警平章政事月魯帖木兒引軍拒之賊不得進月魯帖木兒俄以疾卒賊遂犯餘杭時執敬已被命討賊海上至

是事急不得去出戰皆不利掾史蘇友龍進曰城內虛空無備將奈何執敬曰吾淬礪戈矛當殲賊以報國儻或不克有死而已何畏哉俄而賊奄入北關遽上馬率眾出中途與賊遇乃射死賊四人賊又逐之射死三人已而來益甚填咽街巷且縱火眾皆潰去賊知其無援呼執敬降執敬怒叱之曰逆賊守關吏不謹汝得至此恨不碎汝萬段何謂降耶乃奮刀斫賊因中槍而墮從僕田也先馳救之亦中槍死詔贈翰林學士承旨榮祿大夫柱國魯國公

諡關

聶炳字韞夫武昌江夏人也元統元年成進士累遷知荆門軍纔半歲紅巾奄至荆門不守炳出募土兵得眾七萬復其城又與四川平章咬住復中興旣而賊將俞君正合兵來攻炳率孤軍晝夜血戰援絕城陷被執極口罵不絕賊以刀抉其齒盡乃支解之未

元書 卷九十二
幾賊陷潛江達魯花赤明安達爾帥勇敢出擊敗之進營蘆泐賊眾奄至出鬪死其家皆被害惟一子桂山海身懷印綬去得免明安達爾唐兀氏字士元炳同年進士也是時又有野峻台者父趙世延有傳野峻台以四川左右司郎中累遷黃州總管湖廣既陷朝廷察其才命參知四川政事與咬住同討賊野峻台分咬住兵八百爲前驅攻破巴東復大破賊江上歸峽以平又進拔枝江松滋乘勝趨中興賊出陣清水門鏖戰至夕賊退入城乃據其門明日賊出大戰咬住軍止百步外不援賊飛槍刺之死贈榮祿大夫陝西平章政事柱國涼國公諡忠壯

納速刺丁字士瞻父馬合謀從征襄陽擢濟州達魯花赤因家大名納速納丁起鄉貢進士累辟掾淮東宣慰司賊發眞州以民兵往襲敗之已而泰州賊起鎮南王府宣慰司請參議軍事納速刺

丁建議築四城立外寨楗隄穿河募兵與賊抗行省檄其提戰艦巡江駐師龍潭口賊至輒改去司召還眞州而賊犯蕪湖南臺復檄來援大破賊江上賊不得渡因留守蕪湖江口行省又以泰州李二方亂令移捍高郵得勝湖賊船乘風來焚破之李二遂降俄其黨張士誠殺二復變襲據高郵屯兵東門納速刺丁會眞滁諸軍討之距三朶鎮賊眾猝至麾兵挫其鋒後賊鼓譟更進以火箭射之死者蔽流而下賊繚船於背盡力來攻諸軍驚潰納速刺丁以死自誓顧謂其三子寶童海瑠丁西山驢曰汝輩可脫走三子不肯去皆死之省憲爲賻其家詔贈淮西元帥府經歷

趙璉字伯器汴梁許州人也祖宏偉字子英歷官浙西廉訪僉事浙東廉訪副使至浙東延致許謙爲師常相講學於是人知向慕時稱爲中州雅望後歷南臺治書侍御史福建廉訪使所至以政

元書 卷九十一
聞卒贈禮部尚書天水郡侯諡忠獻璉以至治元年成進士歷官
杭州路總管爲人強毅開敏浙右病徭役民充坊里正者皆破家
朝廷令行省召八郡守集議璉言以屬縣坊正爲顧役里正用田
賦以均之民以爲便盜斫人於市以索金市民懼乃戶斂以與之
璉遣卒掩捕之盡戮諸市召拜吏部侍郎杭州立碑頌焉歷禮部
戶部尚書參議中書省事出爲遼東廉訪使是時河南兵起湖廣
荆襄皆陷而兩淮亦騷動乃析河南地立淮南江北行省於揚州
以璉參知政事璉方病卽輿疾行旣至則分省鎮淮安又徙眞州
而賊張士誠已陷泰州行省討之不克乃命高郵知府李齊往招
諭之士誠因請降且乞從征自效乃授以民職復移璉鎮泰州而
趣士誠具戈船趨濠泗士誠本僞降又覘知璉無備遂以夜四鼓
縱火登城璉力疾捫佩刀上馬與賊鬪市衢賊圍璉邀至其船璉

曰汝罪在不赦今旣見宥又錫以名爵朝廷何負汝而復反耶我
執政大臣豈爲汝賊輩屈乎卽馳騎奮擊賊以槩撞璉墜地欲昇
以行璉瞋目大罵遂死之其僕楊兒以身蔽璉亦俱死泰州民歸
其屍殯於眞州詔賻鈔三百錠諡曰忠定仍錄其子錡以官弟琬
字仲德仕至台州總管方國珍弟國瑛以舟挾琬至黃巖琬潛登
白龍巖止民舍絕粒七日或勸之食輒瞑目卻之而死
李齊字公平廣平人也家貧常客江南工辭章元統元年進士第
一歷僉河南淮西廉訪司事移知高郵府有政聲張士誠反旣破
泰州淮南行省遣齊往招降被拘久之賊首自相殺始縱齊歸而
僞乞降泰州平賊徒尙蠶聚士誠復鼓變殺參知政事趙璉掠官
庫走入得勝湖俄陷興化時左丞僕哲篤及宗王來鎮高郵使齊
出守暨社湖齊旣出而數賊入一呼省憲官皆遁齊急還救則賊

已閉門拒守蔓延入寶應已而有詔悉赦叛者詔使至高郵不得入賊給曰必李知府來乃受命行省再強齊往至則閉之獄中齊益辯說士誠本無降意特遷延爲繕飭計官軍謀知之乃進攻城士誠呼齊出叱使跪齊叱曰吾膝爲鐵豈肯爲賊屈乃曳倒槌碎其膝乃之論者謂大科三魁秦不華沒海上李黼隕九江及齊皆無愧云其時往諭高郵者復有孫撫盛昭撫字自謙曹州人至正二年進士原官濟甯路錄事已歸里朝廷遣翰林待制烏馬兒往招張士誠而用撫輔行撫家居不知也中書加撫集賢待制給驛強起抵高郵士誠不迎詔撫既入城反覆開諭士誠陽竦聽已而拘之他室欲脅之降撫惟詬斥而已乃令其黨捶撫肆其陵辱撫不恤也及士誠徙平江撫與其部將張茂先謀持撫先所授站馬劄子遣壯士赴鎮南府約日進兵復高郵謀泄竟爲所害後賊中

見失節者輒嗤曰此豈孫待制耶詔贈撫翰林侍讀學士護軍曹南郡公諡曰忠烈並賜田三頃恤其家昭字克明歸德人官淮南行省照磨行省遣昭入高郵授士誠官士誠拘諸舟中及官軍至高郵則授昭以兵使爲之拒昭叱曰拘留詔使罪不容誅反欲吾從汝爲賊耶賊怒先剗其臂肉而後磔之

王伯顏一名簡字伯敬濱州霑化人也累官知福甯州居三歲遷福建運鹽副使將行憲府以時方俶擾留仍領州事未幾賊自邵武閩道逼福甯伯顏乃與監州阿撒都刺募丁壯五萬分扼險要賊至楊梅嶺立柵卽率仲子相馳破之賊將王善俄擁眾直壓州西門胥隸皆解散麾下惟白梃市兒數百人伯顏射賊不反顧賊以長槍刺馬馬仆遂見執善曰聞公有善政欲乞再尹此州伯顏叱曰我天子命官不幸失守義當死肯從汝反乎善怒叱左右搯

使跪弗屈羣毆之伯顏嚼舌以血噴善曰反賊殺卽殺何毆爲吾民天民也汝不可害大丞相親討叛逆雷擊電掃汝小醜耳將無遺種顧敢爾耶賊亦執阿撒都刺至善厲聲責其拒鬪噤不能對伯顏復唾善曰我殺賊何言拒耶我死當爲神以殺汝言訖挺頸受刃頸斷無血惟涌白沫如乳暴屍數日色不變時年已七十賊竝殺阿撒都刺而留相欲官之相詈曰吾與汝不共戴天恨不寸斬汝我受汝官耶賊又殺之陳陽盈字子謙官泉州稅課使是時以伯顏檄率民兵拒賊被執抗義詈賊亦同見殺相妻潘氏挈二女爲賊所獲亦罵賊母子同死伯顏旣死賊時覩其引兵出入明年州有僧林德誠者起兵討賊乃望空呼曰王州尹王州尹宜助我賊遙見四面皆青衣軍大敗走福甯遂定詔贈濟南路總管上輕車都尉太原郡侯後伯顏長子楨收得父母屍藁葬烏程朝命

龔父曾除紹興總管張士誠陷城楨亦不屈死

劉濬字濟川其先興州人也曾祖海金進士第一仕至河南府尹死於國難子孫遂家河南濬以廉訪司書吏授連江甯善鄉巡檢斬賊王善寇閩官軍守羅源拒之羅源與連江接壤勢將迫濬妻眞定史氏故相天澤家女也有才識謂濬曰事急矣宜卽聚兵因盡出奩中物募壯士百餘命仲子健將之浹旬間眾至數萬賊尋破羅源分兩道攻福州濬拒之辰山三戰皆捷俄聞福州陷賊眾驚潰濬獨率健兵進遇賊於中麻突其陣斬數人而賊大至濬中箭墜馬健下掖父俱被獲濬戟手大罵賊縛之階下先斫其一指罵益厲再斫之指且盡斫兩腕及足濬色不少變罵聲猶不絕遂割其喉舌死健亦以死拒賊善義而舍之使斂濬屍葬焉健歸請師於帥府以復讎弗聽乃散家貲結死士百人詐爲工商流丐入

賊中夜半發火大譟賊驚擾自相屠戮健手斬殺其父者張破四并禽善以獻傑之事聞贈濬福建行省檢校官授健古田縣尹官爲濬立祠福州北門外有司歲時致祭焉是時陳君用字子材延平人行省以其勇猛署南平尹散家財繼官錢募兵導官軍復建陽浦城等縣授同知建甯路事往援福州又大敗賊眾憲司版授權同知副都元帥遂引兵踰北嶺至連江中槍死贈浙東宣慰司同知副元帥輕車都尉潁川郡侯諡忠毅

彭庭堅字允誠温州瑞安人也至正四年進士授同知沂州事毀牛皇神祠驅鄰境上馬賊免民橫急徵斂民甚便之俄以平反獄囚忤上官意遂棄去數年詔選守令起崇安尹以禦鉛山寇功遷同知建甯路事江西寇大熾庭堅帥民兵克復建陽尋又平浦城攝僉都元帥府事會邵武總管吳按台不花夾攻邵武寇遁追斬

其渠卽擢福建道宣慰司副都元帥鎮焉建甯縣陷復之江浙行省檄庭堅節制建甯邵武二郡諸軍盜侵政和松溪南臺中丞吳鐸時在建甯檄庭堅至鎮撫萬戶岳煥素悍縱卒爲暴庭堅欲繩以法煥懼使部卒乘其不備詐爲賊兵突入戕庭堅死故吏張椿等請奉其柩葬崇安復立像爲祠歲時祭禱數降靈響旁邑祠祀亦如之南臺御史行部巡察獲其賊斬之上其事贈本道宣慰使都元帥忠愍侯仍表其墓廟

石普字元周徐州人也至正五年進士授國史院編修改經正監經歷淮東西盜起樞密僉院董鑰薦普才時丞相脫脫討徐州命從行徐平歷遷樞密院都事從守淮安普詣丞相面陳平賊之策且曰今張士誠據高郵高郵負重湖之險地皆沮洳騎兵卒莫能前願假步兵三萬保取之高郵旣平則濠泗易破普請先驅爲天

下忠義倡丞相壯之命權山東義軍萬戶府事招萬人以行而汝中柏方用事陰沮之滅其軍半初令普便宜行事及行又使聽淮南行省節制普行至范水寨日未夕普令軍中具食夜漏三刻下令銜枚趨寶應卽登城樹幟城上賊大驚潰因撫安其民由是諸將冀分普功水陸進兵乘勝拔十餘寨將抵高郵普分軍三一趨城東備水戰一爲奇兵虞後一普自將攻北門賊戰不利遁入城普先士卒躡之縱兵燒關門賊懼謀棄城走總兵者遣蒙古軍千騎突出普軍前欲先入而賊以死捍蒙古軍懼怯卽馳回普止之不可遂爲賊所蹂踐率墮水中普軍亂賊乘之普勒餘兵血戰良久杖劍大呼直入賊陳中援兵忌普成功按不進從者僅三十人搏戰至日西被創墮馬復步戰數合賊益至指曰此必頭目可生致之普叱曰我石都事也死賊奴可殺我俄左脅爲槍所中猶力

握其槍斫賊賊眾攢槍以刺與從者力盡俱死

褚不華字君實陞州石樓人也爲人沈默有器局始爲中瑞司譯史累擢南臺西臺御史遷河西廉訪僉事移淮東進副使紅巾蔓延兩淮不華行部至淮安極力爲守禦計且請於知樞密院老章以判官劉甲守韓信城相犄角復上章劾總兵及諸將逗撓狀朝廷嘉之進位廉訪使劉甲有智勇與賊戰輒勝賊憚之呼曰劉鐵頭不華頗賴焉而總兵聞其劾已則大恚嫉乃檄甲別將兵擊賊以困不華甲去韓信城遂陷賊乃掘塹相銜撻水寨以圍淮安旣而青軍黃軍復叛不華知事危退入合刺章營賊稍引去乃出楊村橋賊奄至殺副使不荅失里啖其屍不華以餘兵入城時城三面皆賊惟北門通流陽阻赤鯉湖指揮使魏岳楊暹方駐流陽淮安芻餉所倚也俄赤鯉湖亦爲賊據流陽路又絕賊益進柵南鎖

元書 卷九十二
橋不華會兵出西門突其柵殊死戰賊敗走復合而城中食且絕
總兵者屯小邨按兵不出不華遣使十輩告急皆不應城中餓者
仆道上卽爭取食草木魚鳥靴鞍革箱敗弓之筋皆盡父子夫婦
老幼更相食撒屋爲薪人多露處坊陌生荆棘力窮城陷不華猶
據西門力鬪中傷見執爲賊所轡次子伴哥冒刃護之亦見殺詔
贈翰林學士承旨柱國衛國公諡曰忠肅賜鈔二百錠以卹其家
不華守淮安五年殆數十百戰精忠大節人比之張巡云

汪澤民字叔志徽州婺源人宋端明殿學士藻七世孫也家貧力
學通諸經延祐五年進士授同知平江州以親老乞降官就近便
養弗許遽奉母之官直李氏嫠婦之枉時議徵包銀澤民不擾民
而事集厯南安信州推官南安鎮守萬戶及巡按御史通路爲姦
見澤民爲之沮作潮州判官錢珍以淫殺推官梁楫事連廣東廉

訪副使劉安仁數委官鞫問弗能白檄澤民讞之而獄立具平江
有僧爲其弟子所殺拘他僧亦誣服澤民以其刀問諸鐵工乃其
弟子刀也一訊而伏於是人皆神之後調兗州知州上言衍聖公
止三品宜增其秩廷議從之至正八年賜衍聖公銀印秩正二品
澤民所啟也澤民以治行聞召赴闕除國子司業與修三史遷集
賢直學士未兩月卽請告以禮部尙書致仕旣歸與門生故人相
往返超然若忘世者靳賊犯甯國廉訪使道童雅重澤民日就之
詢守禦計城得無虞明年長槍軍鎖南班等來寇或勸之去澤民
曰我雖無官守顧受國厚恩臨危愛死非臣子節遂留甯國籌畫
戰守屢敗賊兵旣而寇益眾城陷爲所執遂遇害時年七十矣詔
贈江浙左丞譙國郡公諡曰文簡時同被難者中興元帥朵兒直
班及百戶王翕翕殺妻子焚其居自刎死

元書卷九十二上

尹智溪 刊

劉世昌 刊

門人曾 鏗襄校

門人曾 士琮詳校

